

18

HARVARD COLLEGE LIBRARY
FROM THE
HARVARD-YENCHING
INSTITUTE

SEP 30 1928

~~Ch L 5570.2928~~

.8
1.7/2928

T 5237.7.2928

明詩綜卷四十一

小長蘆 朱彝尊 錄



毗陵 徐永宣 緝評

羅洪先 六首

洪先字達夫吉水人嘉靖己丑賜進士第一授

翰林修撰進左春坊贊善罷為民隆慶初贈光

祿寺少卿謚文恭有念菴集 王元美云羅達夫如講師參禪兩處著脚不堪高坐

穆敬甫云贊善多講學詩間有唐調黃清甫云羅詩詞意貴顯雖取材不遠而屬對為精

經廢棄久處民間往往深於致情易於興感殆亦近於言志者也

靜志居詩話達夫遠師擊壤近仿白沙定山然爽氣尚存未墮塵霧

雜詩 二首

故人萬里外夜夢忽在茲一去二十年宛若平生儀因
悲久離別再拜前吐辭舉手雙涕下自訴長相思覺來
天一涯彼此安得知豈無同心言道遠孰致之人生重
結交結交在當時對面不傾倒相思亦奚為
煩歎不能寐披衣步前楹仰視天漢流衆星一何明萬
動皆有息人生何所營久佇風露下灑然當我情

獨坐

數月不出戶庭前多夕陰閒看芳樹色一倍舊年深

山中雜詩

問我家何在山深多白雲巖前飛瀑下對語不相聞

後園續詠

二首

棠梨花開深淺黃燕子初飛日漸長草亭坐久客不到
半雨半風春太狂

南村雲起北村晴晴鳩雨鳩更互鳴東風吹雨衣不濕
我在桃花深處行

唐順之

十二首

順之字應德一字義修武進人嘉靖己丑進士
除兵部主事改吏部尋改翰林編修歷右春坊
司諫上疏請朝東宮奪職為民起兵部郎中巡
視薊鎮還視師浙直超拜僉都御史巡撫淮揚
天啓中追謚襄文有荆川先生集

穆敬甫云唐公詩
典雅春容綽有盛

唐體裁 顧玄言云中丞古體如雲津躍龍幻變莫狀近體如風澗鳴
琴幽逸有致竝足流響詞林 胡元瑞云嘉靖初為初唐者唐應德素

永之屠文升王汝化任少海陳約之田叔禾等為中唐者皇甫子安華子潛吳純叔陳鳴野施子羽蔡子木等俱有集行世就中古詩冲澹當首子潛律體精嚴必推應德 蔣仲舒云弘正間李何輩出海內遵之迨其習弊音響足聽意調必歸剽竊雷同正變雲擾太史振之為初唐宏麗該整足稱羽儀 黃清甫云應德初務清華晚趨險怪考其所撰若出二轍故譽有所自毀亦隨之 應德於學無所不窺大

則天文樂律地理兵法小則弧矢勾股壬奇禽乙刺鎗拳棍莫不精心叩擊究極原委以資其經濟有用之學晚而受知分宜僂力行間身當倭寇轉戰淮海受事未幾遂以身殉可謂志士者也正嘉之間為詩者踵何李之後塵剽竊雲擾應德與陳約之輩一變為初唐於時稱其莊嚴宏麗咳唾金璧歸田以後意取辭達王李乘其後互相評砭吳人評其初務清華後趨險怪考其所撰若出二轍非通論也 陳卧子云應德氣象爽邁才情駿發使能深造當有超乘其後馳騫功名詭託講學遂頽然自放

詩話荆川開濟之才閱覽百家靡不融會毅然自任天下之重倭人構患志在捍牧圉以保鄉曲是時督師之權惟甬江梅林是寄公舍當局二人誰可與談方略者顧不知者以公為甬江所薦介溪所知因此薄公豈惟昧於知人并不識時務者矣其建平倭之策謂當禦之海外故北自崇明南至蛟門乘桴破浪身作先鋒積勞而殞是豈專馳騫於功名者耶襄文之謚允符公論也已公初與遵巖論文兩不相下既乃舍所學從之竊怪集中五言古詩特少殆退舍以避遵巖也至於律詩質不傷文麗而有體

送孔上公助祭太學歸闕里時賜袞衣一襲

國喜嘉賓至人攀上客行
來觀周室禮去入魯王城新
袞山龍炫餘堂金石鳴
聖朝稽古意待爾示諸生

同皇甫子循游橫山

曲磴行來盡松陰
轉寂寥不知茅屋近
却望石梁遙葉響疑聞雨
渠寒未上潮夫君軒冕客
此地欲相招

送白尉往湖州

君家太湖北作吏
太湖南驛路雞鳴
近山城樹影含萬川
疏沃野百室競春蠶
幸此猶吾土微官也自堪

張相公壽詩

帷中運策九州清
共說留侯在漢京
賜第近連平樂觀

入朝新給羽林兵儒生東閣承顏色酋長西蕃識姓名
却望上台多氣象年年長傍紫宸明

鍾廣漢云壽詩如此典重允稱拔俗

廣德道中

蒼山百轉見炊烟茆屋高栖古樹顛細雨薜蘿侵石逕
深秋秔稻滿山田雲中望影迷遙岫草裏聞聲覺暗泉
儻遇秦人應不識只疑誤入武陵川

聞復官報京師友人

姓名不復挂朝參魚鳥由來性所耽篋裏符經都已廢
山中藥草漸能諳疎狂自分三宜黜嬾病其如七不堪
深謝故人推轂意莫將陽羨比終南

崔鎮道中晚望懷陳約之

郊原極目思依依楚水連天楚樹微遠浦潮生人獨往
寒林風靜鳥雙歸泥塗自覺朋游好日月偏催旅鬢稀
念爾同爲南竄客烟波何事更相違

覽徐養齋見懷毛古菴及小子之作存沒感懷和韻

早歲曾陪杖履遊遙思墓木已三秋美人去後空聞笛
芳草歸時獨倚樓世上玉顏還易老山中石髓杳難求
却慚司馬頻相許擬向清湖共釣舟

冬至南郊

明王敦大報泰時禮神君位以南離正宵從甲子分月
臨太乙館星動羽林軍除道疑登岱鳴簫異度汾聲容

六變合海嶽百靈紛封檢微題字屏帷悉畫雲神光人
共見天語帝親聞盛跡誰能賦多慚扈從羣

松關

月出照松關松陰正滿地恐有山僧歸終夜不須閉

筠徑

面面隔深竹茅齋在何處遙聞犬吠聲試從此路去

古北口

諸城皆在山之坳此城冠山如鳥巢到此令人思猛士
天山萬里鳴弓弣

李開先 三首

開先字伯華章丘人嘉靖己丑進士除戶部主

事改吏部歷員外郎中擢太嘗少卿提督四夷

館罷歸有閒居集

朱中立云中麓著作甚富一韻百篇蓋白樂天之流也詞浮意淺繩墨中多何尚

焉

嘉靖初王道思唐應德倡論盡洗一時剽擬之習伯華

與羅達夫趙景仁諸人左提右挈李何文集幾於過而不行雅負經濟不屑稱文士在銓部謝絕請託不善事貴人已遷太常會九廟災上疏自陳罷歸歸而治田產蓄聲伎徵歌度曲自詡馬東籬張小山無以過也為文一篇輒萬言詩一韻輒百首不循格律詠嘲談笑信手放筆嘗自序閒居集云年四十罷官歸里既無用世之心又無名後之志詩不必作作不必工其所著詞多於文文多於詩改定元人傳奇樂府蒐輯市井豔詞多士大夫所不道者嘗謂古來才士不得乘時柄用非以樂事繫其心往往發狂病死今借此以坐消歲月暗老豪傑耳晚作塞上曲百首其老而益壯不甘自廢如此

詩話中麓撰述潦倒踈疎然最為好事藏書之富甲於齊東詩所云豈但三車富還過萬卷餘又云借抄先館閣博覽及瞿曇是也先時邊尚書華泉劉太常西橋亦好收書邊家失火劉氏散佚無遺獨中麓所儲百餘年無恙近徐尚書原一購得其半予嘗借觀愛籤帙必精研朱點勘北方學者能得斯趣殆無多人也噫嘻文淵閣藏書例許抄覽先具領狀以時繳納世所稱讀中祕書蓋謂是已奈典籍微員收掌不慎歲久攘竊抵換已鮮完書可為浩歎聞中麓後人尚餘殘書數十部巡撫丹徒張公物色之中有陸農師禮象一編張公歿後訪之不能得矣

苦熱

昏中日在柳炎帝司其職苦渴多病身煩熱何相逼
淡旬難夜眠近午始朝食止螫藥無能驅蚊扇無力莫為
觸暑行且就繁陰息官微罷復久賜冰胡可得神馳寒
露臺夢想雪山域妄念不須存秋涼當在即

塞上曲

二首

虎旅紛紛列虎牙龍庭漠漠走龍沙未交八月先飛雪
已盡三春不見花

一春不見煖融天自是要荒氣候偏落地雪花原是雨
漫天榆莢不成錢

呂

高一首

高字山甫丹徒人嘉靖己丑進士授戶部主事

改兵部歷郎中出為山東提學副使轉行太僕

少卿有江峰漫橐

莫子良云先生詩本初唐燕國曲江二張而晚出杜陵大曆諸子間

嘉

靖八才子山甫與焉沒後李伯華為作傳序其遺文評隲諸子長短以雅致稱呂今所傳江峰橐似不堪與諸子驂乘而景仁叔仁皆以文筆著叔仁文章奧博不欲居王

唐下惜其詩集散佚不傳

詩話詩莫盛於正德文莫純於嘉靖之初自後七子派行而真詩亡古文亦亡矣山甫與富順熊過叔仁名在八才子之列雖未能驂乘王唐亦一時之雋也王浚川數當時作者有唐子羅子趙子王子江右則有尹子曾子胡子陳子尹名臺字崇基有洞山集陳名昌積字子虛有龍津集曾胡二子不能悉舉矣

省中直宿

疎星歷歷露為霜獨宿瑤宮夜未央樹色暗浮天仗外
香烟遙接御爐傍鈞天月上聞長樂玉漏風移出建章

不遇武皇行幸日空憐頭白滯為郎

陳束 五首

束字約之鄞縣人嘉靖己丑進士選庶吉士改

授禮部主事已復改編修出為湖廣僉事徙福

建轉河南提學副使有后岡集

王允寧云后岡誠穎秀第語淺氣促寡詩人之

致皇甫子循云約之詩早鑄四傑晚鎔二張適軫平原晞駕康樂

王元美云陳約之如青樓小女月下篋篋初取閒適終成淒楚又如過

雨殘荷雖爾衰落嫣然有態顧玄言云約之詩篇篇都秀潤句句少

警拔亦就色相中自然寫出黃清甫云陳詩巧構新思善詠故跡華

而不靡舊而彌鮮益以筋力美篇豈少哉錢受之云約之初與應德

倡為初唐以矯李何之弊晚而稍厭縟靡心折於蘇門陳卧子云約

之典禮之作依然司隸衣冠

詩話約之取組

六朝亦稱典則

咸寧山中雪霽晚行

雪霽乍見山殘陽稍辭嶺暝色起烟氛寒光散墟井田

空獵犬還林凍棲鳥警遙聞野寺鐘初月生俄頃

晚望有懷

高閣罷餘霧曠然見遙岑依微夕照滅窈窕寒雲深隱

几獨成趣據梧時自吟惟當草玄者寂莫知予心

還浙夜泊江口

越嶂宜春望江舠入夜乘潮移諸島出雲卷數峰層近

郭翻多戀還家獨未能北堂今夕夢先已度西興

都下秋雨夜飲王子長宅

闊別時何屢蹉跎鬢已侵還朝明主賜卜夜故人心涼

雨杯初覆空堂漏欲沉安知非夢寐相對帝城陰

送李子

山城細雨綠蕪滋黃鳥關關送別時海內為鄰千里近
湖邊傾蓋十年遲蟬聲驛路催官騎草色河橋映酒旗
遙想經行多逸興逢人莫不寄新詩

任 瀚 二首

瀚字少海南充人嘉靖己丑進士繇吏部主事
補春坊司直兼翰林簡討有忠齋橐

詩話少海遇青城山異人授鴻寶修煉法家中盤盞皆點汞銀為之同
時熊叔仁亦好服食煉形之說而羅達夫之死燕齊海上之士或言其
仙去是時青詞丹籙西內尚未營齋而諸君愛道實開其先已
少海老去自吹秦感粟西征曾比漢嫖姚之句詩家類多稱之

病懷

海甸逢南菊殊方也自花江淹新卧病玉粲老無家皓

月千門夜秋風雙鬢華還持石函記勾漏訪丹砂

五丁峽別衡崑

峽天猿嘯萬山秋御宿相逢轉別愁後會知誰先白髮
清時勞汝問滄洲繩牀對月此村夜霜杵擣衣何郡樓
聞道西京最蕭瑟可堪歸路曲江頭

程文德 一首

文德字舜敷永康人嘉靖己丑賜進士第二累
官吏部左侍郎兼翰林院學士改南京工部左
侍郎贈禮部尚書謚文恭有松溪集

長洲訪常劉二子

籃輿春曉度浮梁懶問城闌六十坊小艇忽臨山盡處

美人宛在水中央疎籬仄徑紆村巷穉柳夭桃映草堂
流寓江山元有分脩然安土即吾鄉

蔡雲程 一首

雲程字亨之臨海人嘉靖己丑進士歷官刑部
尚書贈太子少保有鶴田草堂集

登雷港驛樓

空江返照映孤洲晚泊聊登驛外樓可歎羈懷無住著
挂帆隨月下舒州

楊博 一首

博字維約蒲州人嘉靖己丑進士除整屋知縣
徙長安徵授兵部主事歷郎中出為山東提學

副使遷參政以僉都御史撫甘肅進右都御史
兵部侍郎升尚書加少保改吏部晉少傅尋加
少師兼太子太師卒贈太傅諡襄毅有虞坡集
送雷信菴出按甘肅

湟中形勝地尚記昔年游清海崑崙斷黃河積石流左
賢失右臂上將得前籌為問乘槎客何時到隴州

胡松 一首

松字汝茂滁州人嘉靖己丑進士累官吏部尚
書贈太子太保諡莊肅有集

舍弟病久得書知小愈喜而有作

汝病經年久常時繫我思池塘春草夢江海鶴鴿詩歲

暮悠悠別天涯寂寂時忽傳消息到喜報細君知

鄭大同一首

大同字皆吾莆田人嘉靖己丑進士歷官刑部

右侍郎贈尚書

天游觀

輕輿斜日上高峰瘦竹疎花萬壑風獨鶴一聲松影亂

月明人在白雲中

楊爵一首

爵字伯修富平人嘉靖己丑進士除行人擢河

南道監察御史上書劾夏言郭勛因極言朝政

廷杖繫獄者再久而得釋卒追謚忠介有斛山

集

詩話斛山手觸逆鱗甘以其身顯棄封事大略謂目前之憂甚大大抵因仍苟且兵戎廢弛公私困竭奔競成俗賄賂通行遇災變而不憂非祥瑞而稱賀讒諂面諛士風民俗於此大壞而國之所恃以為國者掃地盡矣又云天下之患莫大乎以危為安以蓄為利實則可憂而以為可樂法家佛士日遠而快意肆情之事無敢有齟齬於其間積弊而至於蠱則不可得而救矣永陵見之震怒下鎮撫司重笞下獄於時晉江周主事天佐救之而死文登浦御史鉉再救之而又死繫獄五稔始得釋纒旋里永陵復諭東廠拘之斛山之在獄也校尉蘇宣喬某楊棟獄官洪百戶咸哀焉及再被逮緹騎亦憐之不相促迫斛山飯已即行立門屏前傳語家人曰有旨見逮吾行矣觀者流涕獄中撰周易辨錄其論文云文以理為主以氣為輔不以偏邪之見亂其心本諸聖賢之言以充養之如此則造語皆自胸中流出其吐詞立論愈出愈新而無窮如日月在天窮居深谷花草木之微青者自青白者自白仰之以生輝觸之而成色矣旨哉言乎詩則信口而作不求工也

中秋懷友

寂寞復寂寞還如去歲秋美人消息遠令我心悠悠吳水既東去秦山不可求思君譚道處念此日幽憂

林 恕 三首

恕字道近長樂人嘉靖己丑進士歷官雲南按察使有西橋集

詩話西橋近詩依然
林子羽王安中流派

舟次白沙驛

長安何處所孤櫂發閩關白擁沙邊驛青迴江上山風
濤添別淚村酒破愁顏羨爾溪中鳥閒雲共往還

同蔣蒙菴朱豹厓登合浦海角寺

共是天南客相攜海角行山連銅柱界水匯越裳城落
日潮聲起高秋蜃氣清故鄉回首望歸雁斷南征

宿唐浪村

黃精釀熟豆初花籬落蕭疎遠市譁地僻虞羅依岸曲
天寒漁火傍江叉燕尋舊壘穿重幕竹引新篁過別家
對景蕭然幽興發可甘萍梗負年華

薛 甲 一首

甲字應登江陰人嘉靖己丑進士除兵科給事中
中以言事謫累遷江西按察副使致仕有畏齋
類稿

生居

生居盈萬間死居纔七尺七尺已有餘萬間何戚戚造
物與我身此身應我役曷以我身故令我不自得

楊 祐 五首

祐字汝承錢塘人嘉靖己丑進士有丹泉集

詩話汝承諸體瀟灑拔俗今鄉
鄙論詩無人屈一指者可歎也

荅陳李二侍御

吏隱滄洲遠江楓伴索居秋風一雁過忽在友朋書獻
納看君輩聲名動直廬東南民力竭奏記意何如

湖夜

湖夜熒熒白蘋風嫋嫋秋斷霞斜照雨冥霧濕依樓萬
國仍多難浮生祇百憂滄江有漁笛何事獨悠悠

雨懷

山城積雨春無事江閣停雲晚自怡芳草不知隨處合
賓鴻何意獨歸遲壯游東閣題詩處恩幸南宮錫讌詩

風景不殊京闕異江湖深繫廟堂思

九日登泰山

殊方此日逢重九絕嶽高吟散遠愁漢時秦封空往事
紫萸黃菊自深秋天清樓閣明三觀野曠山河辨九州
獨是懷親憂國意白雲滄海共悠悠

簡田長官

矯矯田郎三輔賢省曹播越五經年河洲水竹新開郡
暇日閒看沙鷺眠

陳子文

一首

子文字在中閩縣人嘉靖己丑進士歷官湖廣
按察副使

夜泊皖城村舍

孤舟野泊初遠寺疎鐘起茅屋兩三間懸燈深樹裏

桂天祥 一首

天祥字子興臨川人嘉靖己丑進士由兵部主事改監察御史巡按山西山東出知大名府

發和州

樓船開旭日涼露灑征衣擊楫橫江浦投詩采石磯潮來紅蓼没人語白鷗飛天際瞻宮殿金陵在翠微

吳子孝 四首

子孝字純叔長洲人尚書一鵬子嘉靖己丑進士改庶吉士授工部主事以光祿寺丞出為湖

廣參議提督太和山有玉涵堂橐

皇甫子循云龍峰才情既美興寄尤

深其詞婉以麗其響和以平其思悠以儁故能蓄藻於建安騰聲於天寶希躅於少陵逸駕於長慶

詩話純叔籍甚詩名特格未高聳其論詩云世之蕘童牧豎矢口而成章田翁野嫗發聲而中節彼蓋不知何者之為詩况詩之所以妙何也天地之機洩之於人者不知其所以然而然也夫詩以言傳亦以言隱求之於迹者非也求之於音者亦非也求之於揣摩擬議者亦非也數語足當正嘉詩人鉞砭

燕

數見沙頭燕翩翩故傷人定知巢已就偏愛語相親碧樹江波闊烏衣故國春卷簾誰為汝飄泊數沾巾

送邾薦和奉使東萊

上宰承周贈王宮抱楚才堂封鸞詔下鏡吹錦帆開海屋魚龍夜仙宮日月臺相如誇負弩旂節幾時迴

秋日與子浚子約小集子循甫赴日南

莫問銀河淺須憐玉笋空洛雲三歲隔楚月一宵同風
櫪悲窮驥秋砧亂候蟲新涼有離思萬里憶征鴻

送楊獻甫之官四川行闡參軍十二韻

越舊憐君去相違萬里餘軍參孫楚事筆草孟嘉書魚
鳥驚新陣貔貅耀舊旟枕榔山葉暗躑躅野花疎村女
誇種布羌人趁葦墟地當三蜀險府控百蠻居關徼留
縑日風雲按轡初巴渝歌甚樂兵騎報寧徐才重松州
幕恩垂洎水車遷喬應不忝學武昔無如贊画元戎喜
籌邊勁寇除少年誰得似俠氣滿儲胥

沈愷 二首

愷字舜臣松江華亭人嘉靖己丑進士歷官寧

波知府升湖廣右參政有環溪漫集

徐伯臣云鳳峰長于律皇甫

子循云環溪閣眇之製湛思以宣綺麗之詞緣情而得茵鼎之貴不能
奪尊鱸之思熊軾之華無以輓扁舟之興不既深於詩乎 穆敬甫云
沈詩肉骨勻稱條達不滯 李時
遠云舜臣詞翰瀟灑有出塵之致

園中雜言 二首

洪鈞陶萬象品彙皆天情四時忽代謝歲功賴有成物
理鮮常盛天道有虧盈哲人秉大觀所以稱達生伊余
無所好夙抱幽人貞一丘常自足千駟良可輕寵祿豈
足貴賤者乃有名

中歲不自好營慮相糾纏寧如返初服停策倚林泉豈
不羨松喬生本無僊緣鍊形得長生此事終茫然有溪

亦可漁有山亦可田營已良已足踰分詎自全青陽不
再御朱華苦易捐欣然命旨酒且以娛天年

王穀祥 二首

穀祥字祿之長洲人嘉靖己丑進士官吏部主
事有酉室集

梅花

風引上春香雪弄江南色為有惜花心樓中莫吹笛

水仙

瑤環月下鳴翠帶風中舉胡然洛浦神胡然漢濱女

沈 謚 一首

謚字靖夫秀水人嘉靖己丑進士除行人擢吏

科給事中終江西按察僉事有石雲家藏集

詩話先生師於陽明甘泉友于龍溪窮
研理學故其詩品亦在元豐淳熙之間

游殊勝寺

画舫連雲動驚濤帶雨飛青山天外出白鶴寺邊歸僧
偈傳金粟蟬聲隱翠微洞庭乘興遠直欲老漁磯

蔡 駿 一首

駿字天章寧晉人嘉靖己丑進士除行人擢浙
江道御史坐劾汪鉉廷杖為民尋以原官起用
再謫山東按察知事隆慶初復職致仕有汶濱
集

過桑乾河入雲中

白草黃沙漠使稀桑乾渡馬駐斜暉孤城雉堞依黃土
古戍狼烟起翠微入夜角聲驚客夢凌風霜氣裂征衣
雲州一望天連水惟是山頭朔雁飛

周顯宗 一首

顯宗字子孝濮州人嘉靖己丑進士除秀水知
縣歷官漢中知府有桃村山人自適藁

詩話桃村於詩未臻門徑惟意所之自序稱感興而作不事強索亦未嘗規規於古人自知之明亦已審矣集中絕句小詩有偶合者

宿安平驛

湖靜冰初合人喧市晚收夜深誰共語寒月獨登樓

莊一俊 一首

一俊字君斐晉江人嘉靖己丑進士官至參議

小居

雀飲硯池水蝶翻菜圃花雖非高士宅終是野人家

張意 一首

意字誠之崑山人嘉靖己丑進士官南職方郎

有日涉園藁

皇甫子循云誠之詩無取模擬而間合雅音本之性靈得於天趣也

詩話誠之與兄情後先取甲第情有公餘寓拙藁詩無足錄者自序以為習氣未除興到輒就不求其工自適其適可謂得失寸心知者也

世宗皇帝輓詩

神謨憑玉几顧命託儲君詔下輪臺悔哀傳薄海聞弓
號遺劔烏龍去失風雲丹宸依然在宮鑪冷夕薰

楊本仁 一首

本仁字次山杞縣人嘉靖己丑進士有少室集

山行

山路登攀倦鄉園何處邊迷津歧路口立馬亂峰顛白
髮雙親遠黃河一綫懸俯看鴻鴈影難寄益門篇

曹世盛 一首

世盛字際卿閩縣人嘉靖己丑進士歷官廣西
參政有方坡集

送凌應賢判常德

雄郡開南紀行旌出北燕別憐孤館夕交憶故鄉年曉
月沉平楚春山帶遠烟離魂與孤鴈共逐洞庭船

孔天胤 一首

天胤字汝錫汾州人嘉靖壬辰賜進士第二以

王府親外補陝西提學僉事歷浙江右布政使

有文谷集

詩話管涔山人如新調鸚鵡
雖復多言舌音終是木強

鴈山峰洞巒壑之勝水石之奇雲物之美多在靈
巖予往臨眺述景散懷

紆轡試委塗迴策亦尋壑過澗厲潺湲攀厓凌峭崿步
滑苔已沉手援葛猶弱磴竟造幽禪山平臨化閣列峰
非一奇芳林紛沃若空水望如烟絕巖驚欲落深洞海
冥冥曾城天漠漠雲物倏然改霞氣時聞作景與玄閬
并跡乃靈仙託將乘琴高鯉或馭王喬鶴

朱衡 一首

衡字士南萬安人嘉靖壬辰進士除九溪知縣
徙婺源徵授刑部主事累官右副都御史巡撫
山東入為工部侍郎改吏部升南京刑部尚書
尋以工部尚書兼副都御史總理河漕加太子
少保召還掌部事有鍾山橐

十四夜待月

日入石梁暝攜僧待華月萬籟方激瑩孤鐘助淒越素
影澹青襟清輝鑑玄髮憮焉遐意存暢矣浩歌發歌聲
難以竟流響振林樾

閱如霖一首

如霖字師望烏程人嘉靖壬辰進士歷官南京
禮部尚書贈太子少保有午堂集

游迎恩寺甯氏園林

逕轉金沙淨壇依石洞幽樹深寧受暑蜩咽似迎秋空
翠含雲落新泉帶雨流歸驂楊柳陌十里暮烟浮

蔡汝楠三首

汝楠字子木德清人嘉靖壬辰進士除行人遷
南京刑部郎中出知衡州府歷江西參政山東
按察使擢兵部侍郎改南京工部有自知堂橐

唐應德云白石盡洗鉛華獨存本質 侯彝舉云白石詩諸體皆合五

言類陸機沈約易者擬子昂七言近體與盛唐諸公相軋而七言古多

似高岑五言近體多似王孟 穆敬甫云蔡詩思深語險不落塵詮

洪朝選云蔡白石弱冠即以詩聞初學六朝既而學劉長卿最後又學

陶韋 王元美云蔡子木如嬌女織流黃不知絲理強自斐然又云子

木少年雅慕建安晚攻錢劉索然易盡 顧玄言云司空詩聲調清雅

情興高朗晚歲率意應酬似出二手 黃清甫云子木登第最早服官
留都與皇甫伯仲日相倡和雅有令譽送別登臨佳句未嘗不在人口
也既而官爵日尊詩格日損必窮乃工豈其然邪

云子木風調得之皇甫兄弟漸摩者居多

詩話白石詩名籍甚與四皇甫相酬和唐應德亟賞之云白石今之名
家也一變而得古作者之精僕非知音亦三歎不能自巳而其鄉錢守
中撰竹里老人沈宗殷傳備述正嘉之際湖州人物之盛有云長興則
吳布衣琬安吉則陳大參良謨烏程則凌訓導震歸安則嚴知府鳳吳
知縣廉唐主事樞德清則沈僉事松武康則駱編修文盛而劉尚書麟
自江右至居蒙塢孫山人一元自陝西至居戴山云云獨不及白石何
與

武夷山詩

夙慕武夷遊已入晴川境稅我塵中車振衣三秀嶺樹
暝疊浮嵐溪虛寫澄影石竇通海流後巖嘯峰頂空洞
駭迴飈遠夢眩殊景倏爾昇雲烟兼復徹軒屏晨翠流
耳目霄陰濯襟領靈跡冠閩甌真機會箕穎榮素寔殊

塗俾子發慙省

化劔閣贈田柅山督學

昔與君子別乃在荆門山雲濤緬相失五載隔五關武
夷寧不懷欲來分水艱不因覲省暇何能晤清顏信矣
延平津神會自昔然高閣出幽岫雙溪迅驚瀾山雨炎
燠銷林華芬藻繁泓澄隱風雷磊落明琅玕方諧意未
悉將別念彌難豈無聲音及獨悵形蹟單有緣期後逢
更極平生歡握手何以贈永好在弗諼

送陳郎中出守廣川

戀別南州守聊為越客吟三江看鴈盡五嶺入雲深風
氣通蠻落人烟接海陰炎方將帝命并切飲冰心

呂光洵 一首

光洵字信卿紹興新昌人嘉靖壬辰進士累官
兵部尚書兼副都御史巡撫雲南改南京工部
尚書未任卒有期齋集

立春前雪應制

天惟玄德感帝念小民依送臘能呈瑞先春果應祈兩
儀渾竝色萬有倏交輝欲繼周文詠還輕郢曲稀

林應亮 一首

應亮字熙載候官人嘉靖壬辰進士歷官戶部
右侍郎總督倉場有少峰集

宿會江

古驛山城外寒江客到稀潮平見魚戲葉落聽禽飛遠
火行人語荒原古渡歸徘徊不知夕零露忽沾衣

范 欽 五首

欽字堯卿一字安卿鄞縣人嘉靖壬辰進士累
官兵部右侍郎有天一閣集

詩話堯卿格律自矜第取材太近時倡和者沈嘉則呂中甫諸人未免
聲調似之其藏書最富今浙中舊族若山陰鈕氏祁氏吳興潘氏沈氏
樵李項氏郁氏高氏胡氏遺書盡散惟
范氏籤帙尚存惜未能泝江就閱也

江上翫月

萬里空江月孤舟日夜看關山何處是烏鵲不勝寒氣
逼銀河轉光含玉露團踟躕瞻斗極鬚髯辨長安

寄陳駕部國祥

不見陳司馬蹉跎幾歲年
長江無旅鴈絕塞有風烟
羽檄連宵動瘡痍何日痊
憑將賈生疏太息漢庭前

雪中簡王惟和

寂寞梁園客迂迴剡曲家
一冬初破雪萬里正飛花
帶雨斜侵幔迴風曲抱沙
相看如不醉辜負此年華

姪澈使滇南

鳳曆千齡啓龍函六詔傳
雲開星使路地盡夜郎天
頒瑞符虞典祈靈異漢年
可令籌國計人復數張騫

東歸次錢唐先寄弟

月落天將曙風高浪欲層
夜來春草夢先已度西陵

蘇志臯一首

志臯字德明固安人嘉靖壬辰進士除瀏陽知

縣徙進賢徵授刑部主事歷郎中出為僉事遷

副使升布政使以僉都御史撫遼東進右副都

御史有寒邨枹罕二集

中丞才
情富麗沾沾自喜

早朝奉天殿接詔

禁漏沉沉曉色遲迴廊華月隱參差
玉階直接承明殿銀漢遙通太液池
咫尺雲函頒聖詔逶迤宮扇肅朝儀
微臣亦見天顏喜未必長教近侍知

顧存仁二首

存仁字伯剛太倉州人嘉靖壬辰進士除餘姚
知縣入為禮科給事中以言事廷杖編管保安

明詩綜卷四十一
隆慶初起用官至太僕寺卿有東白草堂集

薛仲

常云吳中詩大都模擬而出雖自相誇詡稱為作者而知言之士不無遺論矣伯剛諸體溫厚和平忠愛惻惻根諸心而寓諸言不假組織而依詠成章得雅頌風騷之道周

子顓云居庸山人詩和平雅澹

詩話陸子餘劾張桂作奏時鬼肅于庭願伯剛起草則鬼近榻前其聲迫矣詰旦鴉又鳴戶上而兩公直言不諱雖受廷咎未嘗殞命使有畏縮何以成名乎伯剛所言五事其一論及黃冠故荅鴻山漸山詩有潮海空傳佛骨書之句也是時金籙青詞猶未盛而徒新曲突君子重其知先

幾焉

岔道

目極長安嶺春生岔道屯看花頻掩淚聞鴈欲銷魂隴霧侵衣濕風沙隔面昏據鞍悲髀肉徒切壯心存

對月

清光此夕為誰秋關月能禁故國愁何處笛聲吹不斷

卧看北斗挂城樓

周復俊

二首

復俊字子顓太倉州人嘉靖壬辰進士仕至太僕寺卿有六梅館集

詩話子顓甄綜鄉黨之詩為玉峰詩纂而以己詩請楊用修評點亦稱好事第諸體多膚淺不足觀

涑水官舍感懷

今夕復何夕倚此明燭光疎星燦前帷三五河漢芻天寒邊雲白歲暮埃草黃古云易水寒重以繁露霜迢迢遠行遊塗軌浩無方眇余苦不達素髮垂中堂所嗟志徒苑四牡厲周行

白水驛早發

東方日未明寒林鳥將散靄靄川霧昏縷縷邨烟亂崩
雲卧岑崖狂飈決門閉迢迢白水程栗栗黑墳岸陰陰
蟲知曙喑喑雞迎旦狔猥儼狙伏徒御失魚貫稍聞滇
水寒已習炎方曠涼冷雖近時陰陽自貞觀吹萬感感
發致一疑憊漫霜封紫柯榮冰蝕丹蘄粲遊子悲遠鄉
夙興轉勞憚朱輪一何翩玄冬豈爲玩駢駢激靡懷鬱
鬱累方歎五斗陶令奔一瓢許君判扣角白石号乘桴
滄海惋永言緝修軌未以塵嬰絆

浦應麒一首

應麒字道徵無錫人嘉靖壬辰進士官春坊贊
善有後巖集

次韻強德州

林屋秋高已自涼山中新酒熟鵝黃銀絲豈必鱸魚膾
金粟齊飄桂樹香泉石最憐微著雨芙蓉最好未經霜
臨流不盡歸橈興隔水漁燈見小航

呂懷一首

懷字汝德廣信永豐人嘉靖壬辰進士改庶吉
士歷官南京太僕寺少卿有巾石先生類橐

阻風登觀音閣用韻

憑高獨上觀音閣落日還登燕子磯鳥道重重高峽險
烟波漠漠遠山微岸吹夜浪豚相拜厓護春巢鷓遠歸
聞道鑿輿回北闕歡心直向五雲飛

王梅 六首

梅字時魁平湖人嘉靖壬辰進士選庶吉士除
刑部主事謫判滁州有柘湖集

詩話柘湖風神韶亮得無累
之神絕句小詩尤見清拔

送林節推赴任瓊州

見說瓊州地烟中疊浪開遠天分島激晴蜃結樓臺水
館鮫人識風檣賈舶來枕榔秋樹好莫怨夜猿哀

登滁州城

淮北淮南節候同荒臺無限北來鴻愁成短夢青山外
倦倚高城夕照中雲樹不堪連海岱商歌何處起秋風
橫塘寂寂蘋花老欲采寒香薦醉翁

江干曲

估客乘潮去春風幾度寒江潮元有信日日至長干

偶成

滁州城樓雲滿梯滁州城下水連堤臨流欲渡無舟楫
愛殺江籬葉正齊

題画寄張廷瞻

渺渺平蕪淺淺沙垂楊疎處見人家二年京洛緇塵滿
愛殺芳洲杜若花

南津

南津津頭春水新草堂滉漾搖青蘋漁歌窅窅遠山碧
時有鷓鴣飛近人

許應元 二首

應元字子春錢塘人嘉靖壬辰進士除泰安知州徙泰州徵授刑部員外郎進郎中出知夔州府升四川按察副使調廣西遷右布政使有漪

堂橐

皇甫子循云子春短律淒清長歌瓌壯

再過懷玉感述

瑟瑟零雨暮熒熒燈燭光我僕亦已痛偃息臨廣堂我何獨不寐起坐思縱橫念我同懷人遠遊在冀方豈無二三子與子共翱翔良友信可懷寧知非爾兄引領旣北睇側身復東望倚閭久相待何以遲遲行修途鯨暑雨塗潦沾衣裳願言託晨風飛止即故鄉

已酉夏宣城道中作

水國去已遠旱陸茲方永朝行指墟烟午餉閱田井曲薄蠶事歇來牟供秬秉丁男與紅女所務良自黽予亦勤餽粥安能厭馳騁微月沉西麓羣壑倏已冥香藹聞鐘聲幽林隔人境且復息微躬明發還耿耿

錢 蝶 六首

蝶字君望揚州通州人嘉靖壬辰進士歷官參議

憫黎詠 六首有序

嘉靖戊申崖吏失御重以積蠹之餘羣黎遂叛攻掠城邑遠近繹騷撫者無策漫以牛酒從事

越歲不戢當路請命征討予分典戎事深悼誅
夷之慘用廣咨諏卒藉天威誅獲渠首殲蕩醜
類總五千餘級諸邨悔過悉歸順焉庚戌夏四
月三日奏凱底定追惟致寇有因覆車當戒感
時述事潛然有懷

在昔邃古初鴻濛闢天地巨擘嶂南海五指鬱蒼翠中
有黎母居伊人尚蒙昧鑿井以飲渴農田亦時藝荒路
曖匪通幽扃或交市雖爾隔華界猶紀王正歲生黎若
草木榮隕隨和厲熟黎若鳥獸于何勞智慧所以古先
聖馭之以不治

粵南本炎嶠矧此瓊崖東玄冬日且和幽郊鮮陰風花
柳蔭廣隰苗黍青芄芄皇仁漸南極草木均化工豈獨
茲黎人物與非吾同軍行直人日感歎心沖沖

朝發城東門夕駐藤江壘殺氣千層雲狼師渡藤水雞
犬皆震驚人民盡奔徙海避愁蛟蛇山匿畏虎兕蛇虎
猶可虞狼毒不可邇軍令甚分明顛仆何由弭伶俜泣
路衢迸淚不能已嗟哉一將功豈獨萬骨毀

海南無猛虎而有麋與麋玄崖產珍木種種稱絕奇斯
物出異域頗為中國推以茲重徵索奔頓令人疲窮年
務采獵為官共饋儀苦云近歲盡無以充攜持直欲訴
真宰鑿此蘇民脂物理固有然忉怛勞人思

葉落當歸根雲沉久必起黎人多良田征斂苦倍蓰誅

求盡餘粒尚豢犢與豕昨當租吏來宰割充盤几吏怒
反索金黎氓那有此泣向邏者借刻箭以為誓貸一每
輸百股削尤相擬生當剝肌肉死則長已矣薄訴吏轉
嗔鎖縛不復視黎兒憤勇決挺身負戈矢鎗急千人奔
犯順非得已赫赫皇章存今人棄如紙
朔風戒良節赫赫張皇師軍門號令嚴震肅將天威壯
士快鞍馬鋒鏃如星飛一舉破賊壘刀斧紛紜揮剖尸
越丘阜踏血腥川坻白日暗西嶺瘴氣昏餘暉翅鼠墮
我前饑烏逐人歸征夫懷慘憂涕泗霑我衣黎人本同
性云胡登禍機神武貴勿殺不在斬獲為息火當息薪
弭兵當弭饑誰生此厲階哲士知其非

尹耕十四首

耕字子莘蔚州人嘉靖壬辰進士由兵部郎中
出知河間府升河南按察僉事坐劾戍遼左有

朔野集

子莘詩沉雄歷落秋興上谷諸篇有河朔俠烈之風

詩話李何詩派竝行曾未幾時而學李者漸少宗何者日多學李得其風骨者前有凌溪後有朔野而已朔野以邊才自負一蹶不振坎壈而終詩如曉角秋笳聽者悽楚

修邊謠

去年修邊君莫喜血作邊牆牆下水今年修邊君莫憂
石作邊牆牆上頭邊牆上頭多凍雀侵曉霜明星漸落
人生誰不念妻孥畏此營門雙畫角

黟縣道中

嶺峻橋橫渡泉懸水逆流映空峰影亂觸石浪花浮歲
月悲行役衣冠憶舊游望鄉雙淚眼休上最高樓

韓淮陰侯廟

背水空留陣良弓早見收身危緣震主面相止封侯落
日荒祠道西風澗水秋君臣終始義爲爾淚長流

關壯繆侯祠

盪寇襄樊日長濤滄魏軍氣雖雄百戰功竟偃三分鬼
馬騰空阜靈旗掣亂雲神絃朝暮曲長向嶺頭聞

秋興

四首

銅龍春闕曉光寒金水橋橫白玉欄見說漢皇求大藥
故邀王母到長安黃金夜獻文成竈青鳥朝翔太乙壇

不是歲星陪帝輦蟠桃誰奉殿中歡

薊門千里接雲中燧火清宵警報同合陣幾窺青海月
鳴鞭爭下黑山風殘冬戰士衣仍薄荒歲孤城廩欲空
南國十年輸輓盡防秋諸將慢論功

十萬鳴弦報吉囊野心狼子是花當連姻故自輕中國
分道頻看入漢疆推轂丈人空肉食操戈遺孽尚蕭牆
不應干羽修文日歲歲三關有戰場

威名萬里馬將軍白首丹心天下聞遼水旌旗餘殺氣
泰山松柏已高墳條侯自靖中州變竇憲曾名塞外勲
獨倚凌烟思將略暮天征鴈下寒雲

上谷歌

四首

大寧無路援開平極目孤懸獨石城遙憶先皇親躍馬
長驅絕塞苦提兵寒流汨汨交樵徑野戍荒荒列漢旌
千載土人談往事伯顏山下有英聲

永寧山外黃花鎮隆慶州倚土木城千里風烟開紫塞
萬年根本是神京分工幸築沿邊壘深入宜防間道兵
見說花當窺伺久窮邊誰識近年情

飛狐倒馬紫荆連此去朝廷路一千向日北門嚴鎖鑰
於今南牧盛烽烟時名受脤當關將歲德臨分破陣年
願假精兵渡遼水莫令疲病久戈鋌

陽河西帶鎮寧流順聖川南是蔚州比歲凶荒猶在眼
向來荼毒幾曾收靈關皆出紅沙嶺直峪斜通白草溝
封殖紫荆端在此倉場芻粟可深籌

紫荆關

漢家鎖鑰惟玄塞隘地旌旗見紫荆斥埃直通沙磧外
戍樓高竝朔雲平峰巒百轉真無路草木千盤盡作兵
誰識廟堂柔遠意戟門烟雨試春耕

春懷

春深關塞尚屯兵萬里邊防拱漢京不為翠華臨遠道
豈應金甲廢深耕轉輸坐見司徒急經略親看相國行
莫訝至尊忘北顧顯陵遷附聖人情

桑喬一首

喬字子木江都人嘉靖壬辰進士除戶部主事

改授監察御史駕幸承天扈從未行乞歸逮赴
詔獄廷杖謫戍九江卒戍所隆慶初贈光祿寺

少卿有詩文集

歐楨伯云子木詩清雅
俊逸有昌黎睂山之風

詩話子木按大同還一日劾四尚書嚴嵩與焉可謂敢言矣然幾殺其
身得不死者幸爾歐楨伯撰廣陵十先生傳十先生者儲瓘靜夫王軌
載卿景暘伯時趙鶴叔鳴朱應登升之蔣山卿子雲
曾銑子重朱曰藩子价宗臣子相其一則子木也

流水

江流九派是潯陽山勢千重擁建康日暮雲帆看不見
夢隨江水過橫塘

包節 三首

節字元達華亭籍嘉興人嘉靖壬辰進士除東
昌推官徵授監察御史出按湖廣抗疏劾守陵

大璫廖斌不法為斌反誣下詔獄謫戍莊浪衛

有臺中湟中二集

莫子良云侍御詩於臺中見遂初之志焉
其言麗以則於湟中見窮愁之蘊焉其言

婉以思

顧玄言云侍御詩意象都新令人

炫日方之玉琢鼎彝欵識工緻特乏弘綽耳

詩話侍御悅研風雅以文苑英華詩可續昭明文選體編成苑詩類選
三十卷亦稱好事其所作大約取材於是西谷張氏惜其立志太銳任
事太勇嫉惡太嚴為讒者所中才與命妨
志與時違故所就止是亦知己之言也

九日宴西寧城樓

九日依邊郡登高倍黯然山風寒擁葉城日澹浮烟菊
亦窮荒見萸應故國偏何期流竄客猶接歲時筵

得侯介潭消息

消息西來未忍聞若為多難復離羣投荒自分先朝露
歎逝那知對隴雲隔歲行塵猶避馬早春芳草已孤墳

生還儻過山陽道長笛何堪聽夜分

贈俠少年

早隨飛將戰龍沙日晚收營過狹斜下馬直趨盧女肆
滿樓喧笑擁琵琶

馮汝弼一首

汝弼字惟良平湖人嘉靖壬辰進士工科給事
中以言事謫潛山縣丞遷知太倉州調揚州府
同知不赴隆慶初追贈布政司參政有祐山集

詩話祐山入諫垣值汪尚書鉉掌吏部恃寵恣肆言官劾之不動祐山
投袂起曰擊之不勝則其志益驕事有不可言者吾當以死爭之疏入
帝怒時禮科給事中揭陽蔡宗愷河南道御史泰和曾翀皆廷杖死祐
山與諸暨翁給事溥等八人俱外謫然翁終以此逐斯隆慶初有追贈
之典也祐山歸田後睦鄰敦俗鄉里德之曾孫孝廉洪
業守其家法輕財博施至今東湖言好義者必曰馮氏

夜發天津

明月天津岸孤帆水底明北來新鴈至彷彿自神京

徐禎二首

禎字世兆長洲人嘉靖壬辰進士歷官廣東參
政有堯山詩集

楊蘭亭奉使北上

出關稱使者知是棄繻生鳳詔從天下樓船截海行五
雲還入夢千里欲遄征到處逢迎是無勞念去程

鄒虹橋新居

欲謝塵中鞅言從野外居短籬齊樹槿新水曲通渠俗
客無停軫幽人有報書清風北牕下高枕意何如

謝少南 二首

少南字應午上元人嘉靖壬辰進士歷官廣西提學有粵臺臺

府江雜言 二首

蠻烟不雨似雲濃白日陰陰慘澹中炎氣熏人冬亦暖不知何地候春風

落日官軍舉號齊瑀戈画盾障山蹊不嫌銅斗通宵擊却厭斑雞半嶺啼

王畿 一首

畿字汝中紹興山陰人嘉靖壬辰進士官南京武選主事有龍溪集

詩話龍溪學術不純詩亦駁雜

登西天目

早起登山去芒屨結束牢但令雙足健不怕萬峰高

白悅 一首

悅字貞夫武進人嘉靖壬辰進士除戶部主事改禮部歷員外郎中未幾補左春坊司直謫永平通判轉南京後軍都督府經歷稍遷南吏部郎中再謫河間通判復轉戶部主事改尚寶司丞有詔遷江西按察僉事俄令致仕有雒原集

皇甫子循云雒原調暢朗而思沉語婉麗而致遠音和平而易感旨雋永而難斲顧玄言云司直以建安風骨兼貞觀思致足以振響長慶繼軌太傅矣

秦省諸君招飲愛山園亭

幽林闢瑤圃飛閣臨華池高賢敞燕會慰我遠遊思情
酣衆音翕日永杯行遲鮮飈空中來坐令炎霧披綠竹
蔭雕榭雜樹綠芳畦夕照燦雲峰澄波漾漣漪淵魚伏
蒲藻鳴鳥遷膠枝歡樂良不極惜茲光景馳慷慨君子
心明明乎令儀散聚靡有常邂逅天之涯眷言崇懿德
式彼周行詩

趙伊一首

伊字子衡平湖人嘉靖壬辰進士歷官廣西按
察副使有序芳園彙

案山

沙圩塔前春草齊案山樓外曉鶯啼画船載酒三湖遍
簫鼓聲中日又西

張謙一首

謙字仲受慈谿人嘉靖壬辰進士歷官按察副
使

東門行

步出城東門泛彼河上舟河流東北馳念子悵悠悠子
行一何遠乃在渤海頭白日照遼陽朔風吹高丘王事
各有程焉得斯須留執手淚盈把杯至不能酬垂楊夾
廣衢有鳥聲相求感之增煩惋怨彼道路修丈夫自有
懷豈若兒女儔贈子明月珠照耀光九州所期在同心

千載為我述

廖希顏 三首

希顏字叔愚茶陵人嘉靖壬辰進士有東雲集
送岱宗諫議謫鎮遠

明堂再續周王禮宣室能容賈誼狂抗世有人還諫草
清時憐汝獨遐荒龍吟鎮澤千峯雨鴈度偏橋八月霜
去住天涯各何意長星猶在太微傍

自注時
有星變

送李約齋戴前峰二諫議謫象郡

天風吹雨氣蕭森行盡江潭是桂林萬死投荒明主意
一封排闥小臣心城臨南斗枕榔出花暗春山瘴癘深
彈劔長歌倍憐汝許身我亦愛南金

送方兵備赴蜀兼懷楊芳洲夫子

西路元戎看仗節南宮詞賦起明經天門初日餘殘雪
江國浮雲伴使星乘興還移浣溪權幾時同過草玄亭
生憎楊柳催春發故向愁邊却盡青

王瑛 一首

瑛字汝玉無錫人嘉靖壬辰進士官監察御史
有石沙溪上集

任丘道中寓目

萬山秋色送行韉高樹雲生欲暮天可是河頭漁艇出
鷺鷥驚起水西田

王廷幹 二首

廷翰字維楨涇縣人嘉靖壬辰進士除行人遷
南京刑部主事歷戶部員外郎中出知九江府
有巖潭集

天壽山行宮

天旆三春發離宮四月開觀河懷禹跡問野見周才日
氣生高嶺雲陰拂翠臺太平叨扈從文雅媿鄒枚

後湖荅皇甫司勳

高皇方息戰於此濬澄湖版籍封疆遠絲綸詔命敷萬
年修禹貢九譯獻周圖自得清風句南中麗景無

錢徽一首

薇字懋垣海鹽人嘉靖壬辰進士除行人擢禮

科給事中轉右給事中贈太常寺少卿有承啓
堂橐

贈呂東匯銀臺

薊門十載別此日意何如濟世餘三策謀身合二疏
跡寄天地真樂自樵漁好借盧敖杖周行五岳墟

高世彥一首

世彥字仲修號白坪內江人嘉靖壬辰進士有

自得齋橐

詩話白坪軒名自得其詩意象從容五言如羣鷗穿藻出一鳥捕魚飛
月令如潮信年光似水流白雲棲樹杪青竹露牆根瑤瑟難爲調牙籤
剩有書朝來沙作篆雲過石爲衣七言如對月云佳辰若此不易得良
夜何其分外明九日云清時容我林泉懶黃菊笑人塵務勞自娛云花
陰數酌陶元亮日課一詩梅聖俞蜀中尚楊用修
派詞多穠郁而其詩清潤如此所當洗眼觀也

冬江

秋盡寒潭斂水痕
斷雲殘雪送朝昏
深冬野鳥巢溪樹
近渚人家掩石門
何處洞簫吹夜雨
一竿漁火徹朝暎
蜀江氣暖春光早
已有林花映小邨

明詩綜卷四十一

明詩綜卷四十二

小長蘆 朱彝尊 錄

清淮 丘迥 緝評

孫 陞 二首

陞字志高餘姚人嘉靖乙未賜進士第二授翰林編修歷右春坊右中允國子祭酒陞禮部侍郎改吏部復改禮部旋復改吏部進南京禮部尚書卒贈太子少保謚文恪有集

穆敬甫云孫詩爾雅足稱上乘

送龍氏

客子欲何之
蒼梧古南粵
相望萬里餘
征鴻杳天末
杪秋霜露零
寒颺迅城闕
曠茲發深慨
而况當乖別
采蘭

以贈君所願芳未歇

送陳氏之留都

結交不在早要在心所當伊人則古昔晤暫情何長云
胡倏行游告言之建康驅車薊北門鼓柂潞河陽川原
悠以邈使我戚中腸自戚還自慰睽離庸詎傷黃鵠摩
青霄遠舉固其常去矣勿復道恒德期不忘

趙貞吉 一首

貞吉字孟靜內江人嘉靖乙未進士選庶吉士
累官禮部尚書入直文淵閣加太子太保卒贈

少保謚文肅有集

文肅詩突兀自
放一洗臺閣鋪陳之習

金陵送取經僧回蜀

洗鉢長干寺鳴榔一葦灣經收唐藏譯歌學楚狂還草
綠金沙島雲開石鏡山慈航偏易渡豈若世途艱

林廷機 一首

廷機字利仁閩縣人嘉靖乙未進士改庶吉士
除簡討遷國子司業出為南祭酒遷太嘗寺卿
陞工部侍郎改禮部進工部尚書復改禮部贈
太子太保謚文僖有世翰堂橐

王元美云利仁如太湖
中頑石非不具體無乃

九日瑯琊山宴集

此日瑯琊亦勝遊眼中風物足清幽青山似識重來客
白髮能禁幾度秋萬事無如行處樂一尊還為故人留

登臨况復逢佳節會取黃花插滿頭

何維柏 一首

維柏字喬仲南海人嘉靖乙未進士改庶吉士授監察御史坐劾嚴嵩廷杖累官南京禮部尚書謚端恪有天山草堂存橐

顏應雷云先生詩冲澹雅雅趣味天然

靜志居詩話端恪詩多雜講學語合格者希其乞休作云樂事尚饒新歲月勝游不改舊雲山侍其父與鄉人爲九老會亦佳話也

夜坐

虛亭面芳沼涼月散遙林坐觀羣動息惟聞蟋蟀吟物性各自適茲理會予心虛明生夜景微風開我襟整衣起巡簷鳴我花間琴緬懷千載下希聆疏越音高梧發孤籟妙契天機深對此不能寐待旦夙所歎

尹 臺 二首

臺字崇基永新人嘉靖乙未進士選庶吉士授編修歷修撰諭德侍講遷南國子祭酒調北祭酒改少詹事兼侍讀學士陞南吏部侍郎進南禮部尚書有洞山集

送西吳張太史使江藩

京國論交幾過從郊筵惜別奈殘冬衝寒裘馬今朝發獻歲鶯花若處逢桐葉剪圭周建爵菁茅立社漢分封歸將錦節停鄉邑玉筍高開紫霧重

光山逢劉唐巖副使

十年芳艸惜離羣海上朱旛隱暮雲何意歸舟停楚澤

萬山黃葉獨逢君

康太和 三首

太和字原中莆田人嘉靖乙未進士改庶吉士
累官南京工部尚書有礪峰集

人日

南國逢人日相傳卜歲華陰晴曾不定時序轉堪嗟地
僻將舒柳山寒未放花草堂詩欲寄羈思正無涯

端午書懷

入夜潮聲急平明江霧開感時人競渡弔古獨登臺野
樹疑分合沙鷗任去來乾坤堪一笑駛景白駒催

仲秋國學陪祀

吾道宮牆在清秋雨露多禮分三獻肅樂奏九成和夜
靜傳金柝庭虛聽玉珂歸途燈火遠星斗耿天河

張舜臣 一首

舜臣章丘人嘉靖乙未進士累官戶部尚書都
察院左都御史卒贈太子少保

雲中曲

黃雲塞北起秋風宣府居庸羽檄同天子臨朝親遣帥
戰袍賜出大明宮

孫植 一首

植字斯立平湖人嘉靖乙未進士除南京刑部
主事累官刑部尚書謚簡肅

詩話簡肅家誠頗嚴諸子析箸後命每夕各出盤蔬榼酒共飲飲必分
題賦詩其意以為兄弟日親則妻妾之言不得而間蓋亦具苦心矣公
之先名固者元處士有詩名聽雪齋集嘉
隆間曾鏤板惜也今其子姓莫有儲藏者

霜降陵祀夜行

夜靜鐘聲徹山深古柏寒回風吹落葉絕壑響鳴湍候
騎林間出懸燈嶺外看神遊列聖遠弓劍五雲端

張瀚五首

瀚字子文仁和人嘉靖乙未進士累官太子少
保吏部尚書贈太子太保謚恭懿有奚囊蠹餘

雜詩二首

王胥習格熊黃公善厭虎血氣一時衰終為黠獸苦安
身貴明哲鷙猛奚足數魯縞本非堅猶能敵強弩知雄

守其雌深藏是良賈

復蛸生枯株脫殼為玄蟬本與稿壤俱一朝憑化遷吐
納月露中櫛沐風雨前微形竊伏匿何意聲日宣螳螂
枉見撲稟質非甘鮮

初夏入濟

我昔駕征航芳華媚初景淺綠曳垂楊輕紅發朱杏忽
焉幾千里始涉齊魯境春風度去陌夏雲薄前嶺花落
樹陰繁鶯鳴晝逾永戀土厭薄遊懷人復心耿天闕五
雲中蓬窗日延頸

歸鶴篇

皎皎雲間鶴不受氛塵侵幽人一以贈馴為階下禽春

風舞翩翩秋月唳清音經年託儔侶欲別意難任念非
夙所隨還歸嘉樹陰客旣眷故鄉鳥亦適故林去矣物
無累懷哉誼已深願比雲霄翼常同萬里心

出塞

涇原北望塞門秋漠漠沙塵暗戍樓羽檄不來羶帳遠
前軍夜獵海西頭

馬

森一首

森字孔養懷安人嘉靖乙未進士累官太子少
保兵部尚書謚恭敏有鍾陽集

分水關

出關聞土盡征路楚山迎曉霧連空暗炎天過雨清人

來千樹杪鳥雜百泉聲每憾復輿闊難從石罅行

靳學顏

二首

學顏字子愚濟寧人嘉靖乙未進士除南陽推
官累遷吉安知府歷左布政使入爲光祿太僕
卿以副都御史撫山西轉工部侍郎改吏部有

兩城集

朱中立云子愚詩宗初
唐雄渾老健卓然成家

出塞

大漠羽書傳君王勅視邊徵兵動河朔伐鼓下祁連鐵
騎金沙冷鵬弓寶月懸由來重恩紀不爲勒燕然

即事

片片輕鷗淥水涯隔溪楊柳是誰家主人有酒不招客

可惜滿林紅杏花

陳堯一首

堯字敬甫南直隸通州人嘉靖乙未進士歷官刑部左侍郎有梧岡詩集

夏日後樂園雜興

吏隱容疎放園居况寂寥護花編架密種豆引泉遙關世思緘口逢人恥折翥無能煉丹鼎華髮日蕭蕭

康朗一首

朗字用晦惠安人嘉靖乙未進士歷官右副都御史巡撫貴州

昌平道中

塵俗每相拘日夕不遑息暫輟簿書勞山間事行役驅車出北郊晴煙委園陌松梢露漸稀艸際霜已白初與市塵違忽見山如積明月含半峰流水時滴瀝良似故山中眷言素所適游子未能歸懷哉安可獲

許穀八首

穀字仲貽上元人嘉靖乙未進士除戶部主事改禮部轉吏部郎中遷南太常少卿謫浙江運副起為江西提學僉事陞南尚寶卿有外臺武林省中歸田諸橐穆敬甫云許公家建業自能為六朝語

詩話石城詩頗近大曆十子

新秋飲秋澗宅分韻得我字

輕颺送騎陽嘉節屈流火故人敞層軒芳筵列瓜果野
老纔登堂良朋漸盈坐展卷道古今泯迹忘爾我赤日
既西暝涼月升樹左高天飛白雲歷亂不成朵遷席向
廣庭縱橫樂皆可既醉乃言旋竟忘白幘墮揮毫贈同
心志合會終妥毋然逐輕肥令人笑委瑣

画鹿行

古來寫鹿誰最賢耶律以後皆無傳吾鄉近推快園叟
毫端物態俱天然快園野叟氣豪蕩此圖全得山林象
疑從靈囿翻然來走入君家錦堂上玄圃平開藥艸生
靈泉倒瀉溪流清溪邊跂跂似求侶艸畔泔泔如有聲
野叟風流不可見綵筆貽君足珍玩霜毫豈羨芙蓉園

銅牌未數宜春苑憐君自是全生者百年意興惟原野
世路逃名不受羈雲厓結伴寧相捨予本江南一散人
悔將書劒誤風塵披圖便欲捐簪珮共採苹蒿樂性真
偶成

新作魚鹽吏遙辭龍虎都乾坤無棄物江漢有潛夫短
笠三山雨扁舟八月鱸茲懷何日遂把酒意踟躕

夏日過西宗別院

退食尚書省聯鑣大士林地開仙梵境客遠市塵心石
竹下空翠山雷生晝陰竭來幽賞意一寄白雲岑

送馬抑之冊封魯藩

惇族開新典馳封輟從官使星過即墨廐馬出長安日

躍扶桑樹芝生泰嶽壇勝游多賦州揮贈故人看

過德州

樓船御北風渺渺過齊東種秫生涯薄誅茅結構同日
沈平野上人語近村中水面看牛斗星槎似可通

雪

吳山冬盡雪初飛極浦彤雲合翠微越女臺邊猶黯淡
蘇公堤上已芳菲他鄉酒盞愁仍把虛室琴書淨可依
所願普天歌樂歲故園休問幾時歸

登五雲山

名山高擁五雲層危磴重重躡屐登西望諸天應咫尺
東來壘嶂總丘陵海門遙指三山樹梵殿常懸七寶燈

便掃蒼苔題短句乾坤高覽記吾曾

王維楨二首

維楨字允寧華州人嘉靖乙未進士選庶吉士

授簡討歷修撰諭德陞南京國子祭酒以省母

歸值地震陷死有槐野存笥集

孫志高云槐野詩示少陵多深沉之思務引於

繩墨必結構中度而後出之王元美云王允寧如馬服子陳師自作奇正不得兵法又如項王嘔嘔未了忽發暗鳴穆敬甫云王詩負氣

不泄沉鬱有調大是少陵之遺俞汝成云槐野詩磊塊瀟灑雖非純雅之辭不失雄渾之氣胡元瑞云嘉靖時為杜者王允寧孫仲可為

六朝者黃勉之張愈光允寧于文矯健勉之于學博洽皆勝其詩允寧論詩服膺少陵自謂獨得神解尤深于七言近體以為有

照應開闔關鍵頓挫其意主與主比其法有正插有倒插而善用頓挫倒插之法者宋元以來惟李崆峒一人及其自運則麗笨棘澀滓穢滿

紙譬如潦倒措大經書講義填塞腹笥粘題豎義十指便如懸錐累人捧腹良可一笑也李舒章云允寧意氣猶可若云學杜尚未有毛分

詩話王允寧孫仲可皆學杜而不得其門允寧自謂七律然尤儒鈍五言有句無篇如千里秋江水孤舟月夜吟高林風葉下遠渚薄雲低花

樹迷官路濤聲入縣門山無雲斷處塔有雁來時三疊尊前酒雙旌面
裏身暮雲迷遠岫春棹響空江天險分秦塞神謀度漢兵尚泠然可誦
也允寧死於地震謗者謂獲罪華山之神攷同時死者尚有楊尚書守
禮楊都御史邦奇馬光祿卿理李伯華詩所云平生三老友一夜委泥
沙也諸公豈皆獲罪於神者邪事在嘉靖二十四年十二月十二日夜
蒲州震尤甚山陰僖順王聰謝亦薨又輔國將軍四人承國將軍一人
鎮國中尉十七人輔國中尉三人庶人五人縣主郡君淑人各一人夫
人四人齊厭死伯華詩又云四方多變異詎止平陽哀戶曹倏降火渭
流却逆泗山崩兼泉涌彗見復風霾犬育在雞卵蛇出由人懷雨豆血
淋漓妖鳥羽毳毳虎產於猪腹人生自驚胎李樹忽結瓜多而更且魁
夜見火城出蓮從上釜開妖孽如此天心可知而西苑君臣方以丹鼎
青詞相尚祇見白龜白鹿頌瑞應者紛紛真可長太息也伯華詩太猶
鄙以其紀事特詳故附錄
以資史局述五行志者

孝烈皇后挽歌

範內留芳訓扶天有駿功仙游知跨鳳聖念為當熊玉
珮虛無裏蒼雲悵望中宜春花照眼淚灑舊時叢

詩話宮婢楊金英欲斃世宗于熟寢以繩束帝喉未絕有張金蓮走告
皇后往救獲甦此嘉靖壬寅年事也訊得同謀者楊玉香邢翠蓮姚淑

翠楊翠英關梅秀劉妙蓮陳菊花王秀蘭徐秋花鄧金香張春景黃玉
蓮凡一十三人悉磔之于市王祭酒維禎孝烈方皇后輓歌仙游知跨

鳳聖念為當
熊蓋指此也

熱

院深風不度火鑠井猶温林密翻包暑蚊多故趁昏何
方無五月明發問孤村蓮洞涼如許茶瓜與客論

駱文盛 二首

文盛字質甫武康人嘉靖乙未進士選庶吉士

授編修有兩谿集

蔡子木云兩谿詩冲澹爾雅出孟貞曜之
上孫志高云質甫詩婉切冲雅似唐人

聲調

讀延生集

適俗韻自少愛山情頗多邇來南山下卜築當巖阿檻

外倚修竹牆頭纏女蘿藹藹叢桂陰鬱鬱喬松柯清泉
日夕流好鳥鳴相和展書坐磐石書中意如何延齡與
養性要在蠲煩苛長生豈敢慕庶以痊沉痾

左順門值雨

曉漏趨朝候殷雷送雨時殿雲低拂檻檐溜急通池自
訝沾衣速何妨退食遲宮鶯春罷轉應濕上林枝

王立道一首

立道字懋中無錫人嘉靖乙未進士選庶吉士
授編修有具茨集

送沈夷齋

飛來雲中雁十五自成行如何同心友各往天一方憶

與君相見桃李熙春陽胡然忽離跡飛蓬卷秋霜天時
有代謝人事安可嘗不見參與辰出沒遙相望雖有盈
尊酒何能解中腸

劉繪二首

繪字子素一字少質光州人嘉靖乙未進士授
行人選戶科給事中轉刑科右給事中出知重

慶府有嵩陽春詠

皇甫子循云先生經術文章可謂兼之若
騷賦詩歌則固北海餘聲宣城寄興非所

專好也

子素詩才氣奔

騰而風調未諧多生俾暮兀之致

詩話潘恭定試士中州得子素卷曰此河岳英靈也子素既釋褐給事
省中偕同官壽貴溪貴溪手玉碗行酒子素揮之次日疏其十罪不報
明年六月朔日食晝晦永陵大恐問天官主何占子素請去言以塞天
怒言遂去位子素亦出守及言再相嗾南省論罷其大指謂飲酒酣歌
自稱豪俠當場蹴踘旁若無人廣聚生徒而要譽多張謙會以恇淫既
歸田講范白之術取負郭水田疏為大壑種魚萬頭牧馬山莊得良駒

六十匹又責僮往來徐揚貨布及鹽課入息以給賓客其答揚用修書
云人情有所寄則有所忘寄而意不縱則忘之不遠惟忘之遠而後我
無所貪無所貪而後能適蓋亦自道也與熊叔仁論文云仙釋二氏非
聖之書吾既不從其道却借彼之言以資吾文所謂文者將何所為乎
為文而雜以二氏語此唐宋間雜學之弊也昌黎不道二氏語與二氏
言必舉六經之言告之子厚謂某秀才文多引莊列頗奪正氣論亦凜
凜至與二氏言便盛稱其教而雜諸戒律毗尼之說却不自覺蘇氏記
大悲勝相諸作至為偈語準楞嚴法華大不宜也其持論甚正詩非所
長比於伯華
稍事裁剪

曉望終南

終南亦何有白雲長英英層峰亘西來巍然臨咸京中
有太一洞窈窕清籟生鬱鬱古柏竦關關春鳥鳴紅泉
石乳溜金竈丹光縈經年鮮人跡翠竇懸空青我欲往
從之坎壈不能行緇塵滿周道躑躅傷我情何能奮飛
去儵然學長生

送吳祥雲赴趙總戎幕

天門昨夜耀龍文大將橫戈正立勲上谷不傳青海箭
漁陽新練水犀軍金笳夜嘯樓前月赤幟朝翻陣外雲
遠客莫辭千里去滿堂珠履盡迎君

薛應旂一首

應旂字仲常武進人嘉靖乙未進士除慈溪知
縣轉南吏部主事歷浙江提學副使改陝西有

方山集

詩話方山以帖括擅長既負時名遂專著述所續通鑑孤陋寡聞如王
偁李燾楊仲良徐夢莘劉時舉彭百川李心傳葉紹翁陳均徐自明諸
家之書多未寓目并遼金二史亦削而不書惟道學宗派特詳爾憲章
錄一編似未覩實錄而成者若浙江通志簡略太甚俾後之欲知前事
者漫無考稽文獻不足徵是誰之過與昔劉仲原父謂可惜
歐九不讀書覽方山遺編頗同此恨詩其餘藝不必論也

贈朱子价

美人淮南來貽我瓊瑤篇扣之作哀玉引被清商絃忽
復渡江去揚帆凌紫煙臨風愴然別佇立還自憐况當
三五夕皓月生嬋娟盈盈媚河漢對影成留連豈無新
相知故舊情獨牽折葵製團扇置子懷袖前采蘭結芳
佩繫子衣帶邊如彼遠行邁勿為中路捐

陳鳳四首

鳳字羽伯號玉泉上元人嘉靖乙未進士累官

陝西叅議有清華堂擇存

王元美云陳羽伯如東市倡慕青樓價微傳粉澤絕工顰笑

始至郡

予本澹蕩人十年滯空谷偶逢純熙運釋擔荷甄錄浮

沉金馬門日飽太倉粟恭承紫宸詔持法佐明牧此邦
古帝丘在昔號淳樸所嗟末世偽浮雲恣反覆秋荼網
何密棘林夜多哭折獄媿惟良受命如集木雖乏淑問
資尚希十師躅願同于公仁無取高門福庶獄惟庶慎
仰禪刑措俗嘉禽庭可巢幽囿艸生綠矢心及茲辰詠
言聊自告

贈別孫子請告還山

丈夫各有志所志在千秋臨歧送將歸解贈雙吳鈎子
有高世才行矣善自謀盛年易就衰去日安可留努力
萬里途及時須好修肯戀京洛塵以貽靜者羞

行經李膺墓

炎精黯無光吹噓賴君子三君世所宗吾愛司隸氏大
厦業將傾一木支未已昊天不祚漢人亡國隨圮偶茲
行役餘幸覩豐碑峙荆榛莽交道荒丘竟誰是龍門徒
想像仙舟渺云逝石麟既埋沒原隰自虧蔽我懷若而
人九原嗟莫起驅車行灑泣落日照寒水

再送環浦憲使

攬轡喜重臨臺端遂盍簪離亭忽此別客思一何深雨
雪燕山道江湖魏闕心知君多古調三歎憶遺音

周天佐

一首

天佐字宇弼晉江人嘉靖乙未進士除戶部主
事上疏救楊爵廷杖卒萬曆中追贈光祿寺少

卿天啓初追謚忠愍有績山存橐

過田家

五月過田父刈麥方暮歸徵租公府吏督責誼荆扉舍
擔具雞黍向吏語依依非敢後官稅去秋穡事微晚場
穫無穀婦織不上機此月幸有麥欲救眼前飢送吏行
出門歎息淚滿衣千村多飽吏不見一農肥

牛恒

二首

恒武功人嘉靖乙未進士仕至周藩左長史

周藩宮詞

二首

蕭蕭修竹映池寒分汲銀鉶灌牡丹報道花朝開內宴
競持金剪繞朱闌

夜來行樂鴈池頭侍女分行秉燭遊唱徹憲王新樂府
不知明月下樊樓

陳元珂 一首

元珂字仲聲閩清人嘉靖乙未進士有雙山集
新構一笑亭于烏石山陰漫述

曾聞劉隨州英采特高妙解印無與言見山始一笑伊
余慙古人拂衣幸同調結屋傍山陰開軒面層嶠庭艸
愜幽懷巖雲增遠眺况有同心人銜杯縱吟嘯翠篠逗
曉風薜蘿收夕照散地有餘歡閉門忘津要悠悠百年
身此意知誰肖

張天麟 一首

天麟深州人嘉靖乙未進士

旌德道中

小邑無郵吏農人半甲兵石樓橫斷岸艸徑入荒城聞
道甘泉駕將臨細柳營風塵何日靜洗眼看昇平

吳瓊 三首

瓊字邦珍婺源人嘉靖乙未進士

送方際明之金陵

津亭楊柳色話別思如何爾向金陵去應聽玉樹歌石
城寒雨散牛首暮雲多好獻匡時策無須念薜蘿

旅邸除夕

老至謀仍拙天寒酒易消冰霜愁裏過鄉國夢中遙一

歲祗今夜百年能幾宵病懷堪自適無復歎蕭條

歲暮書事

海上猶多壘江東未息兵如何觀察使遽報武功成寒
沍凝春令陰霾蔽日明不堪黃浦路雞犬寂無聲

施峻 三首

峻字平叔歸安人嘉靖乙未進士除南京刑部

主事歷郎中出知青州府有漣川集

王元美云施平叔如小邑民築

室器物備完

徐伯臣云平叔詩隨時上下而格調渾厚體裁平

實固一代之良

茅順甫云施青州詩音響與寄與荆川相上下

詩話平叔以七律自詡問黨交稱焉然殊不見好諸體過修邊幅未免氣餒顧箸溪序之謂唐以後詩音調格律相尚鍛鍊益工其氣益弱母

乃微辭也乎

撒秧謠

東阡有田三十畝秧穀已撒十五斗去年薄收難接新
種得早稻方救貧相傳今年晚更好十分祗宜一分早
東鄰西舍皆晚禾我種早稻知如何

郊扉

青入秧田雨黃連麥坂雲郊扉聊騁望世事不須聞竹
外鳩雙語花前鶴自羣溪邊來縣尉載酒勸農耘

寄王屋張山人玄超

隱隱茅堂鎖白雲萬峰飛瀑靜中間徵君只在東西崦
碧樹叢深路不分

郭萬程 一首

萬程字子長閩清人嘉靖乙未進士刑部主事

有雲橋集

仗劍

仗劍遊薊門蹉跎歲華晏中懷日鬱紆結髮從遊宦一
謝鹿豕羣誤蒙犬馬豢宮殿生游雷浮雲在清漢徒有
憂天心無從墮首諫退而礙祿養進則涉誹訕悔作章
句儒書空徒浩歎忠義本區區焉敢私憂患耿耿平生
心何由懇親串

茅

瓚一首

瓚字邦獻錢塘人嘉靖戊戌賜進士第一累官
太子賓客吏部左侍郎兼翰林院學士有見滄
先生集

寄王冉山

清商涼氣肅白露瘁庭柯美人去極浦一夕秋風多言
念燕婉情攜手南山阿為樂苦不周良游忽蹉跎瞻彼
松柏枝引蔓附女蘿而我同心侶悵別情如何

袁

煒一首

煒字懋中慈溪人嘉靖戊戌賜進士第三授翰
林編修歷侍講學士禮部右侍郎進尚書召入
直改戶部加少傅兼太子太傅建極殿大學士
卒贈少師謚文榮有元峰集

王元馭云公詩華富溫
密無棘塞詭眾之詞

詩話永陵自壬寅宮婢之變即移御西苑萬壽宮不復居大內先是嘉
靖二年四月太監崔文等於欽安殿修設齋供請駕拜奏青詞此金錄
青詞之萌芽也其後齋醮日盛一時詞臣以青詞受寵者甚眾而最
稱旨者莫若袁文榮煒董尚書份如世所傳醮壇對聯云洛水元龜初

獻瑞陽數九陰數九九八十一數數原于道道通元始天尊一誠有感岐山威鳳兩呈祥雄聲六雌聲六六三六六聲聲聞于天天生嘉靖皇帝萬壽無疆此則文榮所撰也時禁中有貓微青色惟雙眉瑩潔名曰霜眉善伺帝意帝甚憐愛之貓死命以金棺葬萬歲山薦以齋醮文榮撰詞有化獅為龍語因題碑曰虬龍冢云王秀才逢年上文榮書曰閣下以時文發甲科以青詞位輔相安知世有所謂古文者哉快意之言然未免直而無禮矣

初夏宴崔太常道院

出郭尋玄圃黃鸝懷好音
瑤壇羣木秀清磬碧雲深
綠酒傾燕市微風動越吟
歸來蹋明月萬戶漏沉沉

翁大立 三首

大立字儒叅餘姚人嘉靖戊戌進士累官南京兵部尚書

吳謳三首

蠶茲田中氓輸租入城府
上逢官長嗔下遭卒胥侮
但保微軀完寧論錢如土
官輸曾幾何羨餘反無數
錙銖苟未償猶然禁囹圄
待得還鄉閭敝廬無完堵

舊徵未云已府帖重徵
新昨朝銀花布今日金花銀
侵晨趨城府薄暮徧鄉鄰
一身應重役重役無寧晨
父母生我時胡不百我身
殘軀被箠楚苦切難具陳
寧為乞市子莫作當官人

鄉民不出鄉何曾識京輔
官家督輓輸僉丁作溫戶
給文督儲臺登數度支部
盈虧日較籌未敢捐區釜
中途忽溝患漂沒河淮澌
經年未能償逢人涕如雨
人憐征戍勞誰憐輓輸苦

陳紹儒 一首

紹儒字師孔南海人嘉靖戊戌進士累官南京工部尚書有司空集

送吳中丞悟齋巡江

青霄繡斧出郊行春水樓船壓浪平聖朝王會自江左才子風流今舊京城隅黃柳色轉變湖上碧桃花欲明正好芳辰無那別勞勞亭畔不勝情

喻時 一首

時字中甫光州人嘉靖戊戌進士累官南京戶

部右侍郎有吳臯海上老人二集

安如山云吳臯詩格律宏雅思出象外

李時遠云海上老人詩思苦澀好用僻事及佛書多斧鑿痕

村舍

塵斷蒼波繞村遙碧嶂臨晴沙隨豕跡風葉送禽音
笑兔園冊獨憐鷗社吟四時真賞在幽事動關心

章煥 三首

煥字懋實吳縣人嘉靖戊戌進士除禮部主事歷吏部考功郎中轉南京太僕少卿進光祿卿以右僉都御史撫治鄖陽改河南巡撫尋以右副都御史總督漕運改督南京糧儲坐誣逮繫遣戍自稱羅浮山人有陽華漫橐

醉翁亭漫題

醉翁昔醉醉翁亭翁醉還看翁自醒我來亭中翁已去

明詩紀卷四十一
六
釀泉之水空泠泠相邀明月坐白石舉首青天橫翠屏
眼前有酒不能酌相逢一笑花冥冥

聞寇至吳門焚劫登樓作

江上黃塵慘不開吳門不見使人哀虛聞青海無傳箭
始信昆池有劫灰忝竊自慚稱吏隱故園何日賦歸來
傷心野哭千家處愁倚滁南百尺臺

南巖宮

三十六巖何者奇南巖巖壑多幽姿飛空欲作翔鸞舞
誇澗真看渴虎垂樹杪迴欄時隱見雲中棧閣故參差
歸旌欲問來時路洞口雲深已不知

萬虞愷
二首

虞愷字懋卿南昌人嘉靖戊戌進士除無錫知
縣徵為南兵科給事中累遷山東叅議福建副
使貴州叅政福建右布政使山西左布政使擢
南京都察院右副都御史入為刑部侍郎有楓

潭詩鈔

山中曉行

攬衣中夜起秣馬早鳴鞭殘月不照地明星猶在天出
門頻問曉歷澗暗聞泉翳翳東林外山雲雜隴煙

烏江廟

入關事已定豈在割鴻溝霸業一朝盡烏江萬古流

查秉彝
一首

秉彝字性甫海寧人嘉靖戊戌進士除黃州推官徵授禮科給事中歷戶科左右給事中坐建言謫定遠典史稍遷建寧推官陞刑部主事改吏部進郎中遷太嘗少卿改大理少卿轉太僕卿終順天府尹有覺菴存橐

贈悟齋吳諫議奉使琉球

玉冊傳殊域天朝簡近臣漢官陳法從周禮貴王人橫海樓船使明河博望津長空浮遠樹壘浪淨高旻馳傳祥飈護揚旌水怪馴彭湖晴似練天界雪如銀雨過龍宮曉雲開貝闕真千年存故國八葉沛恩綸異俗敷文教通儒羨席珍一新唐號令不數漢和親磊落凌霄氣

昂藏報主身鳴珂期不遠民瘼陞前陳

詩話京尹為諸生時夢受杖暗室中仰見廟額懸天上春回四字後任戶科給事上疏劾嚴嵩父子詔廷杖六十謫定邊典史恍惚前夢因賦詩云九重天上春回日二十年前夢裏身京尹為今吉士慎行嗣璪高祖嘗出家集見示鈔撮數首近覓笥中散紙不得僅存長律一篇

周怡一首

怡字順之寧國太平人嘉靖戊戌進士除順德府推官擢吏科給事中以言事受杖繫獄久得釋隆慶初起遷太常少卿及卒鄉人私謚莊簡先生天啓初追謚恭節有訥齋集

詩話訥齋封事因罹嚴輔臣市恩修怨而發疏中有云陛下日事禱祀而四方之水旱灾傷未能消也歲開納銀之例而府庫未能充也歲頒蠲租之令而百姓未能足也時下選將練士之命而邊境未能寧也深觸永陵之怒廷杖之下錦衣獄踰年乃釋既而與楊爵劉魁仍連繫所著訥齋集大半獄中與爵等倡和作也

明詩紀卷四十二
知二弟至用韻慰之

歲晚吾長滯秋深爾遠來
鵲鴿飛已急鴻鴈去還哀
伯氏喜猶在爾懷強自開
可憐風雨夜須酌解愁杯

王健七首

健字偉純永嘉人嘉靖戊戌進士歷官光祿少卿有鶴泉集

過馮公嶺

飄飄谷雲飛泠泠澗水流
水雲亦何心旦夕使我愁
憶昔離鄉縣迨今逾二秋
形容日以變光景去不留
墨翟非咸英楚王惡卞璆
主恩不時遇志士徒包羞
井渫豈不食受福明王求
攘袖啓篋笥攬取雙吳鉤

贈江臯陳子

日月五代謝火旻忽西馳
荃蘭秘幽谷芬馨誰復知
矯江臯彥文采未彰施
鳳凰栖庭梧鵬鳥運天池
機哉不可度神物固有時
君其抱明志終始以自持

上陵

玉帛來天府衣冠去國門
萬年周典禮七葉漢陵園
月擁玄宮迴星依紫極尊
翠華如在上瞻切五雲屯

送友

良晨餞我友長鋏歸去來
請歌青玉案贈別黃金臺
一鳥日邊下片帆天際開
知君意不適行矣首重回

別建安尹陳石陽

王粲忽不樂陳琳將遠行三秋離別思十載結交情日
下飛鳧影雲中去雁聲有懷他夜月夢繞建安城

懺閣阻雨

危崖側轉路千重懺閣登臨坐午鐘可是潭龍來聽法
半山香雨忽濛濛

題湖南處士卷

湖南結屋水雲間十里平湖抱岸還日落沙明開玉鏡
芙蓉倒浸郭公山

張秉壺

一首

秉壺字國鎮莆田人嘉靖戊戌進士歷官太僕
少卿

過楊文敏公塋

豐樂橋前擁紫雲路人指視太師墳不為子姓干恩澤
力與鄉邦寢運軍國有三楊翊社稷門無一字表元勳
高賢去矣餘封土落葉蕭蕭日近曛

溫新

三首

新字伯明洛陽人嘉靖戊戌進士官主事有大
谷集

宿靈寶

驛館桃林在山城木葉秋我行聊駐馬訪古憶歸牛風
浪黃河近塵沙白日愁鄰家好明月今夕自高樓
白溝河先世武功所在感而賦焉

朝行清苑市暮渡白溝河此地煙塵渺先人戰伐多野
猶存大樹世已罷橫戈涉水思鴻烈臨風發慨歌

野菊

重陽不見鄉園菊野徑折來尤可憐為客正當嶺海外
逢花偏憶酒杯前荒英斷葉愁相把落日飛雲恨轉牽
兩歲佳辰俱自負幾回欲賦不成篇

沈鍊二首

鍊字純甫一字子剛會稽人嘉靖戊戌進士除
漂陽知縣調荏平再知清豐入為錦衣衛經歷
坐劾嚴嵩廷杖謫田保安州尋為嵩所陷僂於
邊隆慶初贈光祿寺少卿謚忠愍有鳴劍集
王元

美云青霞詩甚奇麗而不能盡削其牢騷憤激之氣
故往往多楚聲 陳臥子云青霞快男子詩亦俊爽

寄諸生楊子中

碧柳青莎怨暮春沙明水白更傷神娟娟夜月當樓靜
冉冉飛花入座頻海畔音書常阻絕山城瘦馬苦逡巡
坐憐物色多惆悵欲覓芳洲彩句新

答陳鳴野社友

十年赤縣頻為吏一疏中朝便落官勞寄音書如夢寐
細籌世路轉艱難馬蹄最識邊沙苦雁影猶驚塞月寒
詞客幸能憐旅况玉門應為賦生還

茅坤一首

坤字順甫歸安人嘉靖戊戌進士除青陽知縣

明詩紀卷四十一
三

以憂歸補丹徒知縣徵授禮部主事改吏部左
遷廣平通判陞南京兵部主事出為廣西按察
僉事歷副使有白華樓玉芝山房老年諸橐

詩話世傳唐宋八大家之目係鹿門茅氏所定非也臨海朱伯賢定之於前矣彼云六家者合三蘇為一爾今文抄本大約出於王道思唐應德所甄錄茅氏饒於賞遂開雕以行即其評語稱關壯繆為關壽亭不亦刺謬甚與文既卑卑詩亦庸鈍觀其酬酢多醫卜星相之流知非意也

春日蹋雪彭城道中

春日獨傷春事稀馬蹄又向雪中歸數家煙火望欲斷
幾樹飢禽寒不飛有客尋詩穿谷口無人載酒欵林扉
看山不覺日已暮千里雲霏生薜衣

莫如忠一首

如忠字子良松江華亭人嘉靖戊戌進士除南

京工部主事改禮部擢貴州提學副使投劾歸

補湖廣副使歷河南叅政陝西按察使浙江布

政使有崇蘭館集

陸與吉云中江抒寫性情諧合風雅五七言近體可以上方王孟抗行岑劉 過成

山云方伯詩緣情體物敷腴雋永
陳臥子云方伯名德羽儀詩頗朴易

送王汝修楊翼少二給諫募兵河南山東

皇明盛文軌武偃不復張雲中一失險曠騎遂縱橫甘
泉照烽火穹廬薄城隍登埤半市傭格虎驅羣羊養兵
百年來國恩竟誰償天子赫震怒徵發無留良王生按
臨淄楊子蒞大梁千金募猛士桓桓奮鷹揚丈夫四方
志狗國在邊疆無專職青瑣搯腕談慨慷

喬世寧

九首

世寧字景叔耀州人嘉靖戊戌進士繇南京刑部郎中遷四川按察僉事歷湖廣提學副使河

南叅政終四川按察使有丘隅集

王元美云喬景叔如清泉放溜新月

掛樹然此景殊少不耐縱觀 蔣仲舒云景叔趣本爾雅調亦清和規

模沈宋時沿李白 孫山甫云三石子詩不作唐以後語盡洗剽斂繁

陋之習一裁於造化 性情之真傳也必遠 詩話何仲默視學秦中景叔親受詩法譚必移日故 其詩整而不浮可與許少華肩並餘茂有過焉者

燕歌行

西日不再中東流無迴波人生如夢寐少壯能幾何朝
馳長安道暮送歸山阿胡不置酒高堂鼓瑟日以歌若
王萬歲罷干戈霍家衛家相經過千金駿馬換吳娥余

者不樂來日無多黃金白髮奈君何

鴻鴈行

鴻鴈何聯翩聯翩西北翔西北曠何許逝將之塞疆我
有一書札緘之金玉箱將以遺所思道路阻且長因風
託羽翼爲爾立傍徨去時春草青歸當秋草黃草黃歲
將晚毛羽恐摧傷願言愛毛羽邊塞多風霜

長安道

長安道直以迂環五城開九衢外羅天市拱皇居中懸
日月耀金樞朱輪驄馬如流水長安道上禁馳驅誰家
少年俠邪徒雄豪去天尺五餘白日殺人當路衢司隸
過不問况乃執金吾人言輦轂之下朝犯法暮伏誅吁

嗟此徒天日無霍家奴衛家奴

竹杖歎

我病常持一竹杖出門入門全爾仗病愈却之曾幾時
不復念爾能扶持我心視汝無好惡祇緣衰健情亦移
何況世情雲雨變妍媸翻覆須臾見寶劍棄擲康瓠留
得時即貴失時賤新人入門故人出秋風那復悲絀扇
鳥盡弓藏自古然竹杖竹杖何足歎

入塞

沙海烽塵息將軍奏凱旋九邊傳露布一夜到甘泉天
子開麟閣都人望馬鞭定知金市裏甲第在今年

秋夜

今夜燕城館忽驚霜露侵寒砧薄暮急落葉下庭深為
客仍多病悲秋正苦吟誰家明月下吹笛更關心

春鴈

春風纔幾日江鴈已春聲關路何時返鄉愁為爾生望
窮遙漢影不盡倚樓情却憶金河北人同出塞行

聞河西警報

上郡連烽火河湟更羽書一時傳警報中夜獨躊躇歲
苦兵戈擾身憐老病餘名山猶未卜何處可閒居

馬湖登覽

四海車書日干旄萬里揚牂牁今作郡魑魅舊為鄉江
自金沙出山連玉嶠長歲時常霧雨艸樹只青蒼舟楫

明詩紀卷四十一
通吳楚榷楠足棟梁千秋賓上國一統見今皇到此真
殊域憑高覽大荒嵐光生澗壑雲氣滿衣裳西徼仍多
難當關詎可忘天王今有道舞羽為邊防

徐楚一首

楚字世望淳安人嘉靖戊戌進士除工部主事
歷官四川左叅政有吾谿集

築圃

垂老學為圃乘秋課築塲編筠聊覆屋壘石更圍墻蔓
艸芟宜盡嘉蔬刈可常親朋時一過漫說午橋莊

沈啓二首

啓字子由吳江人嘉靖戊戌進士歷官湖廣按

察副使有西臺越吟楚吟家居雞窠諸橐

過越王祠

湘湖雲樹杪翼翼表崇祠殿古巖煙合苔深石磴危霸
圖昭越絕教訓首西施尚想烏鳶曲君臣別淚滋

黔陽舟中

黔陽春草碧雲齊萬壘青山萬曲溪久客不禁鄉土思
半檣殘月子規啼

王問八首

問字子裕無錫人嘉靖戊戌進士除戶部主事
歷郎中遷廣東按察僉事以父老請歸及卒門
人私謚曰文靜先生有仲山詩選祇役橐原筮

明詩卷四十二
齋集崇文館彙

王敬美云子裕詩脩然清遠穆敬甫云仲山如姑射仙人吸露餐霞都無塵瑩之氣

詩話仲山兼擅畫書詩画多游戲詩不起艸五言平行者多歌行稍覺頓挫近體亦嫌率易越縑宣紙流徧人間披覽手書或與集中詩有異由其才多下筆不能自休字句轉易皆於俄頃也

贈友人

秋風吹衡宇絡緯已宵吟忽忽歲將暮誰不念所欽合
并嗟難久會合喜自今良辰且為樂胡不日鼓琴白駒
一朝去金玉懷爾音交義永不薄悠哉君子心

贈別沈少坡寅長

白門柳花覆大堤東風吹來逐馬蹄征車迢迢君解攜
故人猶在鍾陵西鍾陵江頭落日低為君執鞭花下迷
憶君路傍春艸齊到處交交黃鳥啼

采蓮曲貽施子羽

子羽為海鹽丞不得志將告歸采蓮湖上故有
是贈

采蓮歸常日暮西江極望平所思在遙浦月滿蘭房未
有期風急湘川不得渡長干女兒不解愁羅裙結束盪
蓮舟始逐輕鷗過別浦還隨飛鷺向中洲中洲別渚常
相見向晚江風各分散獨惜流光歎落花芳菲易盡心
先斷

築城謠常熟縣作

築城入荒艸白沙無煙莽浩浩築城上高山崩崖錯愕
青冥間我生不辰可奈何昔日防邊今備倭馮馮一杵

復一杵丁夫如雲汗如雨星火出門露下歸野田苗稀
黃雀飛今年縣官復徵稅城下相逢只垂淚

官軍來

白鶴舖前沙日黃湖渚艸長倭走藏柘林舊賊驕不去
新舶正發南風狂寶帶橋西蛟起舞白石山邊逐虓虎
湖南六郡多旌旗賊勢西來疾風雨城頭戍鼓聲如雷
十城九城門不開剗羊宰牛具宿酒日夜祇望官軍來

團兵行

銷鑱鑿鑄刀兵佃家丁男縣有名客兵貪悍不可制糾
集鄉勇團結營寧知縣官不愛惜疾首相看畏占籍奔
命疲勞期會繁執戟操場有飢色星火軍符到里門結
束戎裝蚤出村將軍令嚴人命賤一身那論亡與存保
正同盟衛鄉里何期遠戍吳淞水極目沙壩白骨堆向
來盡是良家子

田家行

田家場圃築過畦大兒當家小兒嬉刈稻上場隱茆屋
黃日下檐雞啄粟人言畝收八斛餘官廩私租未及輸
樂歲家家猶自苦今日江南不如古

贈之山

之山家太倉州爲園種竹歌咏自怡海寇至避
居金陵與子月夜步柳堤想念疇昔悽然傷懷
城柝聲悲夜未央江雲初散水風涼看君已是無家客

猶是逢人說故鄉

何御六首

御字範之福清人嘉靖戊戌進士歷官浙江鹽運使有白湖集

別何子

北風吹征襦與子重契闊仰盼雙禽翔握手不能發一似野中蓬一似弦上筈朝望在河梁河水鳴活活夕思隔河梁浮雲起天末悠悠生別塗慎矣無飢渴

觀碧雲寺坐石泉邊酌酒

侵晨發廣源到寺日亭午回見山下居頗異闔中土樹底禽關關巖間鹿麇麇鐘鳴出紺林香藹薄珠宇薜荔

當高垣薜蕪雜脩楚入門釋襟裾衆僧相導武軒軒望虛堂歷歷轉迴廡石泉山下行流杯坐中取淅淅靜心源皎皎鑑神府即此慰遐情何戀珪與組

青龍橋南遇山人汪旦

沼湖行欲竟前望青龍橋茅茨鬱煙火稍已鄰紛囂故人歟相值雅見塵外標長揖立道左眷言相招邀山居當甕麓轉岐路非遙松膏堪繼夜菰米足供朝畦蔬滴露薤林果炊新蕉慷慨珍來意宛戀停予鑣野風吹秋水征馬鳴蕭蕭願留竟莫克投贈媿瓊瑤

鄭林二君就北園

僻郡稍無事而多載酒臨雨消秋後瘴雲薄竹間陰紀

會賓朋寡看年鬢髮侵惟君數來往聊慰望鄉心

自東粵歸口號

嬾慢時將棄逢迎世所稱歸與從漢水去矣學於陵鶴
唳聞青野猿吟出紫藤君看山谷士未必盡無能

過慶原

野燒萋萋尚雨痕半山斜日近黃昏驛亭阻絕來時路
煙火蕭條戰後邨倦鳥驚人移浦樹寒潮帶月上江門
長年書劔催行色肉食慙孤報主恩

俞憲一首

憲字汝成無錫人嘉靖戊戌進士歷官湖廣按察使有遼海金陵蓬萊轂下外臺去楚當奕諸

集

詩話汝成手輯盛明百家詩足稱好事而甄綜未當舍彼蘭蕙反存葦菴卷首題識都不成文

趙陵舖

岸谷遷移不可憑空餘春樹曉煙凝年年芳艸王孫路
走馬何人問趙陵

陸師道一首

師道字子傳長洲人嘉靖戊戌進士官至尚寶司少卿

晚過治平寺

修竹藏精舍香林遶化城窗中九峰秀門外五湖平綠
樹涼雲合丹楓夕照明祇緣山太靜易得感秋聲

明詩綜卷四十二

明詩綜卷四十三

小長蘆 朱彝尊 錄

海陽 金成棟 緝評

嚴 訥 一首

訥字敏卿嘗熟人嘉靖辛丑進士改庶吉士授
編修歷侍讀學士禮部侍郎進尚書改吏部加
太子太保兼武英殿大學士卒贈少保謚文靖
有集

對月

良宵不可得清賞詎相違影落山精鏡光寒織女機林
鳥驚漠漠花露靜輝輝萬里邊城客防秋正未歸

陸樹聲 一首

樹聲字與吉松江華亭人嘉靖辛丑會試第一
改庶吉士授編修累官禮部尚書卒贈太子太
保謚文定有集

靜志居詩話平泉在史館相高壽日同館皆更緋衣入賀公獨青袍立
高目攝之不為意也其後定陵踐位即家拜禮部尚書江陵將援之入
閣授以意佯為不覺竟托疾歸江陵大愠比歸遂不復
出天下高之卒時年九十有八與魏文靖同洵人瑞也

白鷺洲

白鷺洲邊建業城幾經攀折柳條生行人莫漫輕離別
聽唱陽關第四聲

董份 一首

份字用均烏程人嘉靖辛丑進士累官禮部尚

書兼翰林院學士有泌園集

送王侍御南還

山木自有枝結交亦有因豈無他人故莫若心所親願
得展婉孌攜手同清塵變故出須臾離別在茲晨如彼
同枝葉一旦東西分子董我食茶各自中苦辛含情各
倉卒匪我言所申

王崇古 二首

崇古字學甫蒲州人嘉靖辛丑進士除刑部主
事累官右僉都御史巡撫寧夏以兵部右侍郎
兼僉都御史總督三邊以右都御史總督宣大
加太子少保進兵部尚書召入協理戎政加少

保卒贈太保謚襄毅有山堂彙橐

李舒章云司馬意氣間整

詩話襄毅詩格聳高橫舉自喜然按之不無孺響

別同鄉諸同年

十載看花侶年來半去留江城憐我別霄漢羨君遊柳暗旗亭道花明禁苑樓征途從此始瞻望不勝愁

登鐘山戍樓

危樓高結跨飛虹古塔峻增對梵宮北去關河連塞上西來風物自秦中洞門暗向前山轉石井深連幽澗通扼險應期追一范不堪搖落戍煙空

方逢時一首

逢時字兆行嘉魚人嘉靖辛丑進士累官少保

兼太子太保兵部尚書有大隱樓集

李時遠云金湖古體擬曹陸近

體上下嘗侍隨州且得之倚輿橫槊間尤稱絕俗穆敬甫云方公詩氣勢雄豪律法嚴整如嫖姚出塞萬馬橫嘶而部伍不亂

過天津

城頭初日亂啼鴉客子行歌上使槎蜃氣高連蓬島近鴈行遙度薊門斜河聲過雨添新漲艸色和煙翳淺沙聞道邊庭猶苦戰九關西望動悲笳

呂時中一首

時中字道夫清豐人嘉靖辛丑進士改庶吉士

累官戶部右侍郎有潭西存橐

穆敬甫云呂公七律在開元大曆間

靈巖寺喜晴和吳學憲

秋山雨過靜朝氛爽氣初開散鹿群倚杖欲攀峰頂樹

披衣猶拂洞中雲青天塔影當巖落曉閣鍾聲別浦聞
自是新晴堪遠眺擬窮丘壑到斜曛

萬士和二首

士和字思節宜興人嘉靖辛丑進士歷官禮部

左侍郎卒謚文恭有萬文恭公摘橐

姜廷善云履菴詩未嘗不工然

非酷意求工者

詩話履菴出荆川之門詩派從其師指授然荆川集中罕存酬和之作故履菴有姓名不挂更何論之句及督學貴陽以後詩另入一格荆川乃許之曰讓汝出頭蓋荆川初入館局詩學初唐晚年效邵堯夫謂其天機自動未免頽然自放矣履菴雖宗擊壤而習染未深觀其黔南諸作頗有似柳柳州者

自炎方驛暮宿亦資孔

遠道資人力扶持萬嶺中仗隨徒隸亂輿放僕夫空雲

動嵐移黑霞收樹斂紅祇貪趨館宿未暇泣途窮

烏撒道中

地當高處峰隨轉雲到窮時路更賒夏半火刀方佈種
晚來牛馬不歸家瘴煙寒鎖蠻村樹嵐霧晴迷客子槎
干羽未能馴鬼國祇貪關市中鹽茶

洪朝選一首

朝選字舜臣同安人嘉靖辛丑進士歷官刑部

右侍郎有芳洲集

詩話舜臣強直自遂為勞堪羅織斃之獄中士林多為扼腕時王道思唐應德輩銳意古文辭舜臣雖不與八才子之列而實聯鑣並驅道思與李中溪書云吾鄉洪芳洲先生文直得韓歐曾王家法吾輩駁雜視之有媿其傾倒至矣詩非擅長

送黃明齋歸姑蘇

明詩紀卷四十一
四
往歲禪林居逢君同棲止予抱子輿疾君洗巢父耳同
賦招隱吟肯効彈冠喜嗟予學不就冠帶束疲繭黽勉
江東行意君雲霧裏胡為塵土間逢子亦在市髭髮半
霜根垢衣露敝泉良久問口談始憶君名氏君有博古
才五車在牙齒上精蒼頡書下綜姬公禮義畫卦之初
機經兵所起星書甘石文地志神禹紀探詣各窮源名
狀何切理遂令侯貴間傳客播芳美頗似驚座陳還如
使氣禰忽驚風露零頓使家園邇去來本無心別離亦
倏爾夫椒山窈深五湖水清泚請君具扁舟高臥從此
始

何遷二首

遷字懋益德安所人嘉靖辛丑進士累官刑部

侍郎有古陽山房橐

李時遠云先生素講
理學詩亦冲淡典實

送人守綏德

戎馬猶嚴警旌旃復遠行龍沙知上將燕領本書生樹
引秦川直山連晉水清因君思保障萬里見長城

萬松菴

青林千尺陰覆此山中閣月出不逢人門前松子落

范惟一二首

惟一字于中松江華亭人嘉靖辛丑進士歷官

南京太僕寺卿有范太僕集

莫子良云太僕詩質
而不浮麗而有則

送人之廣東郡幕

春杪都門道清尊送客行一官趨郡幕萬里是王程瘴
嶺排雲入蠻煙入市生回看鄉國樹黯黯正含情

龍華廢寺

鴈塢猶初地龍華半劫灰棟虛雲氣隱簷漏日光來馴
鴿羣迎客香花亂點苔還憐杯渡者何日問津回

雷賀一首

賀字時雍豐城人嘉靖辛丑進士歷官右副都
御史巡撫四川有雷中丞律選

宿郢東驛

策馬驅殘口開軒候晚風鳥迴雲夢北花發石城東宦
況重來減風光別後同幾番經夙夜身世歎飄蓬

謝東山一首

東山字少安射洪人嘉靖辛丑進士歷官右副
都御史巡撫山東有近譬軒詩抄黔中小橐

次雲屏九日韻

海門孤嶼湧中流千古龍祠在上頭記得雙旌蒼水使
春風一舸下渝州

林懋和一首

懋和字維介閩縣人嘉靖辛丑進士歷官廣東
左布政使有櫟寄集

憩玄福宮

碧殿依青嶂丹臺入紫霞聊因駐征蓋復此訪仙家洞

隱疑無路林凋尚有花山童陳石髓羽客進胡麻石上
柯初爛壺中景未斜赤松如可見從爾學丹砂

萬衣一首

衣字章父潯陽人嘉靖辛丑進士歷官河南左
布政使有草禺子集

九口蒲圻張魏二省丈見邀

年年客裏逢佳節今日登高復異鄉二妙恰逢天上侶
孤臺宛在水中央白衣似爲幽人至黃菊能如故國香
別後出關秋正杪年華旅思共淒涼

王應鍾一首

應鍾字懋復候官人嘉靖辛丑進士歷官山東

叅政有缶音集

題謝中皋卷

林栖懷獨往人境迥遺羣一徑通樵路千山藹暮雲林
禽當戶嘯澗水向田分偃息亭皋上玄言不可聞

龔秉德三首

秉德字性之濮州人嘉靖辛丑進士歷官湖廣

按察副使有三幻集

朱中立云虹川詩和
粹婉麗藻思駿發

夏日齋居即事

首夏物始和端居恣游行林木花已敷池荷葉未展布
穀啼空桑流鶯下崇峴雨餘竹韻清日上巖光顯澄心
扇自捐縱目簾初卷偶因謝簿書兼得理墳典叨籍力

不任冒榮分非淺感茲華髮生滄洲若在眼神與元化
并思將遺慮遣守道情自愜處順顏無覲升沉嗟倚伏
明晦歎尋轉性本戀煙蘿敢云輕軒冕

曉發龍潭道中

霓旌蕩煙靄星駕轉岩堯水落龍潭淺山連雉堞遙林
昏猶辨月江冷不聞潮漸覺鍾陵近淒涼憶六朝

雨花臺眺望

崇臺縹緲出雲孤春日憑虛覽壯圖江繞潯陽遙辨楚
山連京口半吞吳秦淮風土憐今昔王謝豪華問有無
回首長干傷往事六朝煙雨半蘼蕪

鄭渭一首

渭字應清閩縣人嘉靖辛丑進士榜姓孫官至
河南按察副使有望川存橐

舟次桐江釣臺

乘舟入桐廬山水得佳憩伏岸倚灘隈連峰上雲際傍
石試躋攀臨流喜容曳目隨魚鳥閒心與漁樵契寂寞
古釣臺青蒼遠虧蔽天晴靈境幽日暮長川逝邈矣羊
裘人高名誰與繼

朱瑞登一首

瑞登字禾仲海寧人嘉靖辛丑進士由桐城知
縣選湖廣道御史歷按察副使有真逸先生集

中秋對月

林塘客萃止待月欣舉觴今夕勝昨夕已見生東方澄
空歛煙霧彌覺清輝揚初猶樹枝杪俄頃天中央徘徊
臨廣除白露霑我裳弦望洵有度明晦何能常良時不
屢值對此宜樂康毋容外物累長近君子光

李時行 三首

時行字少偕番禺人嘉靖辛丑進士除嘉興知
縣徵授南京兵部主事有青霞集

詩話少偕罷官歸里與梁公寔黎維敬歐楨伯吳蘭皋結社
稱南園後五先生其詩體格雖卑然亦清穩無叫囂之習

別吳山人擴

客中仍送客離思渺難任岐路一尊酒故人千里心歸
雲衝落雁寒角亂秋砧湖海風塵裏前期何處尋

酬張符臺秋夜閣直見寄

禁苑含香入高秋複道平疎星移鳳闕明月上龍城夜
半聞天語風前遲漏聲思君在霄漢清夢隔蓬瀛

寄廣陵高子通徐伯可

憶昔逢君客帝京留連郎署十年情看花並醉長千里
走馬同過白下城春入吳宮芳艸色月明蕭寺暮鍾聲
別來迢遞天南北一望江湖感慨生

張習 一首

習字子翀寶應人嘉靖辛丑進士官郎中

塞上

密雲今重地遙望幾重山西入黃花鎮東連黑谷關邊

臣常帶甲首女不垂髮慚負司農識蒸民食尚難

瞿景淳 一首

景淳字師道嘗熟人嘉靖甲辰賜進士第二授翰林編修歷左諭德侍讀學士以太嘗寺卿領南國子祭酒事陞南吏部右侍郎卒贈禮部尚書謚文懿有文懿公集

秋懷

秋夜不能寐起視臨軒墀明月入我懷幽恨不自持憶昨赴京洛正當月弦時月明幾圓缺我行無還期祇應清光同千里長相思

吳桂芳 一首

桂芳字子實新建人嘉靖甲辰進士累官工部尚書兼副都御史總理河道有師暇哀言

東湖

東湖行一曲十里柳煙齊遠嶼浮空碧長雲壓水低岸香聞杜若沙淨浴鳧鷖更愛維舟處夕陰蓮葉西

劉 崙 一首

崙字山父無為州人嘉靖甲辰進士累官大理寺少卿

天津即事

秋盡蒹葭白露晞片帆遙指朔鴻飛天橫絕塞孤雲遠水遶寒城落照微四海徵求方訴急九邊征戍未言歸

天津橋上空回首封事誰當達禁闈

趙 鈇 三首

鈇字子舉桐城人嘉靖甲辰進士歷吏科都給事中陞南京太僕少卿有無聞堂橐

從軍行

從軍有苦樂從軍良不惡官家選民兵我軍只守城民兵負戈戰我軍立觀變民兵骨如山將軍不汗顏但得我軍在城墮不稱敗我軍生死將軍命將軍護軍如護印將軍有時罪猶錄行賞我軍恐不速莫歎身無衣居無屋但報寇入邊我軍有馬兼有粟如此從軍心亦足

白龍潭

白龍水底眠猶放雲光入有時化作人獨向峰頭立

古藤洞

古藤生洞口不遣遊人入酌酒坐藤陰飛泉忽相及

胡 安 三首

安字仁夫餘姚人嘉靖甲辰進士歷官苑馬寺

卿有趨庭集

黃太冲云樂山詩極多雋句

無題

春到春歸不旋軫綠陰稠處花開盡泥中何得粘飛絮
墻頭忽見過新筍荒園落莫待我來小車久閣無人引
獨倚南樓待月明平生嬾作河陽尹

閨意

涼風動袖湖波起岸頭月影如秋水蓮房摘盡蓮葉低
含啼轉向芳閨裏征鴈還從北地飛山川何處不沾依
應知薄倖思羅綺不著年年寄到衣

固原

柳色凋殘雨未收陽關西去更堪愁平川落照連秦苑
古道吹煙覆驛樓刁斗風清初禁夜氍毹月冷盡防秋
雲山最是淒涼地今夜邊關第一州

汪一中一首

一中字正叔歙縣人嘉靖甲辰進士繇工部郎
中出為江西按察副使閩廣寇至戰死贈光祿
寺卿謚忠愍有南華山房集

汪禹又云正叔近體典
雅雄渾有盛唐人矩度

送吳舍人還楚

百年心事獨依依千里思家願不違燕塞夕陽孤雁渡
荆門秋雨一帆歸曲終江上人何處雲散荒臺夢已非
莫向鍾山賦搖落朝廷獻納似君稀

任環一首

環字應乾長治人嘉靖甲辰進士歷官山東右
叅政贈光祿寺卿

詩話倭人入犯任公大小數十戰功最多歸熙甫詩云江南列郡盡乘
城藏穴何人肯出兵惟有使君躬擐甲劉家港口看潮生公軀瘦瘠倭
人目曰瘦官人望而避之
詩特其寄興然亦明淨

和張石川野航之作

蘆花汀畔獨移船一曲滄浪興杳然已付世情流水小

遂令心事老江邊
閒憑魚浪傳書帖
淨愛鷗沙占酒筵
便與先生訂幽約
乘槎直欲犯青天

江珍一首

珍字民璞歙縣人嘉靖甲辰進士除高安知縣
徵授禮部主事遷南京兵部郎中出知廣信府
轉按察副使歷浙江叅政按察使雲南右布政
使終貴州左布政使有華委堂集

汪禹乂云民璞五律温厚典雅蓋枕

籍唐人而有得者

寄汪伯玉職方

聞汝燕山信秋深已飭裝如何冰雪候猶未到江鄉舟
楫關河阻兵戈道路長倚闌思不極雲樹渺蒼蒼

徐文通一首

文通字汝思永康人嘉靖甲辰進士歷官山東

按察副使

王元美云徐汝思如初調鷹見擊鷲故難獲鮮

岱宗

岱頂凌霄十八盤中原蕭瑟思漫漫振衣日觀三秋曙
倚劔天門六月寒風雨黃河通瀚海星辰紫極近長安
小臣願獻蓬萊頌閭闔高懸謁帝難

魏文煥一首

文煥字德章侯官人嘉靖甲辰進士歷官四川
叅政備兵松潘有石室私抄

遊武卮

躡步上昇真長揖紫霞客茲山多靈異想像銀臺闕
草吐金光慧泉注丹液仙翁挾茅龍棄世如遺跡回首
謝所親尚留赤玉鳥我欲往從之茫茫水雲白誤與軒
冕期學道恐無益

張才二首

才字茂參西安衛人嘉靖甲辰進士歷官按察

僉事

王元美云張茂參如荒倉渡江揖讓簡略故是中原門第

詩話元美評茂參詩比之荒倉渡江茂參之言曰自六義輟講而詩教寢衰五傳異觀而文體漸裂今昔殆不相及矣務艱者氣鬱而不信樂易者神渙而弗耀侈博者意累而靡潔至或思不通圓而極貌摹倣識未周洽而委心剽竅支戾勿經踏駁可厭篇帙雖富豈足稱哉其意亦似不滿於瑯琊歷下二子度其集必有可觀而惜其罕傳里有姚叟澣曾問牧齋宗伯茂參何名牧齋不能答則其論詩之旨聞之者益鮮矣

朝陵歌二首

本朝陵墓傍燕關殿閣參差霄漢間王氣千年朝北極
雄圖萬里抱西山
松門回首七陵遙春殿金燈鎖寂寥地迴忽看星斗動
夜深疑有鬼神朝

劉鳳一首

鳳字子威長洲人嘉靖甲辰進士官至河南按

察僉事有澹思太霞二集

李于田云子威掘奇索隱抗心無前屠長卿云侍御思苦志

勞力勁神王沉淵無底排雲直上索著騷賦古文數十萬言觀者驚其繁富憚其奧僻相與駭掉慄眩望洋而歎以為古之振奇人也嘗試為之解駁疏通一再尋繹肌劈理解已而索然不見其所有矣余嘗得子威所誦讀遺書觀其丹鉛考索大繫於篇中擷句於句中擷字而所擷之字自一字至數字而止如唐人所謂碎金薈蕞者耳其有所撰述也累僻字而成句字稍夷更刺僻字以蓋之累奧句而成篇句稍順更撫奧句以竄之而字之有訓故句之有點讀篇之有段落固茫如也鉅釘堆積晦昧詰屈求如近代之江

爰李滄溟且不可得而况於古人乎韓子曰降而不能乃剽賊子
威其剽賊之最下者與陳臥子云子威意在獨造頗傷冗仄
詩話子威局守干鱗唐無古詩一語歎為知言其詩鑿積纂組節節俱
斷俾讀者茫然如墮雲霧中吳趨土風清嘉不意出此鈍漢所著澹思
太霞二集類一時顯名者序之盛相揚詡而吳市賣卜人表孟逸每向
人挾過其字句鉤棘文義糾繆者以為姍笑子威聞而大怒愬之有司
有司既撻之而數之曰若敢復姍笑劉侍御詩文耶伏地對曰民寧更
受笞數十不能妄諛劉侍御也蓋州楚之公論尚存勝於士大夫曲徇
多矣

懷友

迴思京洛日初及壯盛時極意但娛樂奄忽歲月馳亦
知計不立才薄靡所施良無根株託飛蓬安可期自我
與君居遠在天一涯出處道不同榮悴古有之反復念
疇昔筋力亦已衰會面諒無由願寄一言辭久要貴能
敦情義兩不疑勗哉崇明德式用慰我私

朱曰藩

五首

曰藩字子价寶應人嘉靖甲辰進士除烏程知
縣遷南京刑部主事改兵部轉禮部郎中出知

九江府有山帶閣集

王元美云朱子价如高坐道人袂衣躡屐忽發胡語

詩話升之詩倣北地子价則法用修其在金陵懸用修画像於寓齋焚
以東官香薦以陽羨茶賦人日草堂之詩與唐李才江尊賈浪仙為佛
事絕相類然其詩實與用修派遠由其牽絲西吳蓋心慕蔡白石故爾

贈袁河內

漢郡繇來重仍傳借寇行山從上黨斷河入大伾平訪
古停千騎班春徧百城西征雲物美憑軾賦先成

贈石城文選拜南太常

我祖都江左鍾山萬古憑朱旗唐鹵簿白露漢園陵懷

里心長往分曹事有恒清齋三五日贈子玉壺冰

飲罷

沙溪雨過漸通潮新漲朝來拍小橋九曲湖塘藏窈窕
數株門柳伴逍遙時魚饌客烹蘆筍海鶴驚人起稻苗
飲罷中庭不成寐夜間河漢正寥寥

將入雲中作

咫尺分胡地崎嶇出漢關今宵看太白一上紇干山

舟行

淥水平如鏡芙蓉媚遠天時聞采菱曲唱近使君船

陳皋謨 一首

皋謨字思贊江陰人嘉靖甲辰進士除知蒲州

歷南京工部郎中有薄游北游南都諸橐

環縣城遠眺

靈武孤城霽色開感時還上最高臺山樓風急熊旗動
關塞天連鳥道回經略久寒西夏膽安危深仗北門才
殊方獨抱懷鄉思日暮愁聞画角哀

劉爾牧 一首

爾牧字長民一字成卿東平人嘉靖甲辰進士
授戶部主事歷郎中忤嚴世蕃廷杖削籍有堯

麓集

王元美云成卿質
秀才俊尚未成家

重陽前一日

楚天愁絕九迴腸漢水煙波動渺茫雁盡北書無日到

秋深南菊爲誰芳江頭落葉催行路峴首浮雲蔽故鄉
惆悵年來遲暮意明朝風色是重陽

蔣孝一首

孝字維忠武進人嘉靖甲辰進士官戶部主事

顧主言云戶部才
情綺麗頗任俠氣

贈顧少叅

白下今才子華陽舊隱居早辭南省貴來著北山書邑
有盧敖井山藏內史廬堂前曳珠履寧羨食無魚

方九敘二首

九敘字禹績錢唐人嘉靖甲辰進士有十洲集

同諸子游靈隱寺夜宿澗西房

厭喧慕幽棲惜陰耽夕憩梵宇枕山阿層巒延遠睇水
石互清華松篁紛蔽翳緣澗蔭芳椒依巖構禪砌嵐翠
罨簷牙靈籟響雲際曖曖日將頽淒淒風且曠稍覺朝
歡闌還因宵賞滯高閣謝塵囂流泉澄夢寐况復偶羊
何寧須狎支惠尚子欣遠遊嵇康慵作吏苟非賢達人
詎知身似寄

鳳山懷古

宋朝宮闕鳳山隈輦路荒涼過客哀青史尚留南渡恨
黃旗無復北庭回沙埋舊井琉璃碎蘚蝕殘碑翡翠開
歎息百年行在所只今惟有梵王臺

余文獻一首

明詩紀卷四十三
文獻字伯初德化人嘉靖甲辰進士有九厓集
送聶子靜南還

十年纔返國何事復南歸歲月冰霜晚江湖鴻雁稀青
山還舊業落日上初衣去住乾坤裏無嗟與世違

李汝蘭一首

汝蘭咸寧人嘉靖甲辰進士

溪上晚歸

徑路草萋萋歸人咫尺迷水聲聞犬吠月色見雞棲露
下沾衣濕星垂掛樹低今宵有風雨多在杜陵西

彭謙一首

謙字德光溧陽人嘉靖甲辰進士有茭東橐

早行

畏塗兼歲暮假寐怯宵征高柳霜前短殘星曉後明板
橋人度影画角戍傳聲野燒前山起羈心黯自驚

張居正四首

居正字叔大江陵人嘉靖丁未進士改庶吉士
陞編修歷春坊學士以禮部侍郎入內閣官至
太師吏部尚書中極殿大學士卒謚文忠有太

嶽集

詩話江陵以奪情為清議所不容然能自任天下之重定陵冲年請大
閱京營之士時掌中樞者山陰吳尚書兌也尚書繪圖藏之家于曩從
尚書孫錦衣使國輔處見之及戚武毅鎮薊大臣行邊簡閱士馬隨上
功狀疏恩晉秩烽火不徹於甘泉者一十五年江陵之秉國成可謂安
不忘危得制治保邦之要矣近靈壽傳尚書維麟撰明史記乃與分宜
合傳毋乃過與于文定與丘尚書書云江陵以蓋世之功自豪固不肯

甘為汙鄙而以傳世之業期其子又不使濫有交游其平生顯為名高而陰為厚實以法繩天下而間結以恩其深交密戚則有賂路人不敢也債帥鉅卿則有賂小吏不敢也當其柄政舉朝爭頌其功而不敢言其過及其既敗舉朝爭索其罪而不敢言其功皆非其情實矣此足以當爰書聞有題詩于故宅者云恩怨盡時方論定封疆危日見才難二語足稱詩史矣

恭勵聖學

元后輔萬邦綏猷良不易若稽古哲王多聞乃建事堯舜帝者宗精一闡微義夏禹既祗德殷高亦遜志成后務緝熙周詩咏小毖猗與休烈光英聲播來嗣今皇體睿明冲齡纂神器爰當訪落初即敞金華秘書帷簡儒彥藝圃覃文思朝昃不遑暇寒暑靡暫離寰宇仰休明風雲慶遭際顧以謏陋質無能補天地願言宗聖功問學登純懿勿云天聰明無為事博識圖書足自娛兼之

益神智勿云富春秋茂葉良可諉寸陰重逾璧居諸易流駛勿云履崇高優游保天位君心苟縱逸萬幾遂顛墜勿云當燕閒可以快志意一暴而十寒細行終為累戒彼鴻鵠心專精道乃致執御必端良勿狎於匪類為山九仞崇成功虧一簣慎初惟克終終保無為治愚臣職司規敢以告中侍

莊敬太子挽歌

鶴馭凌霄漢龍樓鎖寂寥空悲仙路杳無復寢門朝綺季辭金輅浮丘侍玉霄惟餘鳳笙曲猶逐白雲飄

舟泊漢江望黃鶴樓

楓林霜葉淨江煙錦石游魚清可憐賈客帆檣雲裏見

仙人樓閣鏡中懸
九秋查影橫青漢
一笛梅花落遠天
無限滄洲漁父意
夜深高詠獨鳴舷

潛江憫澇

水漲平堤沙岸迴
野田今見荻花開
江濤挾雨秋仍壯
塞雁衝寒暮獨來
歲晚風霜歎客枕
夜深燈火傍漁臺
悲時已有江南賦
愁聽荒城画角哀

殷士儋 三首

士儋字正甫歷城人嘉靖丁未進士累官少保
兼太子太保禮部尚書武英殿大學士卒贈太
保謚文通有金輿山房集

王忠伯云先生登高而賦餞別而歌體齊魯之雅馴兼燕趙之悲壯采吳越之婉麗以求勝于歷下婁水之間

送劉希宏驛宰之高郵

迢遞淮南驛風煙隔楚波
潮平漁火近日落客帆多
遠樹生鄉思青山入棹歌
春來見芳艸知爾憶鳴珂

送趙萬舉守淮安

聞道淮陰郡輿圖屬上游
雲連江國曙地接海門秋
特簡中朝彥遙分南顧憂
青山迎列戟芳艸待扁舟
楚甸歌新牧瑯琊識故侯
津橋通晚泊膏壤課春疇
樹色依官舍潮聲入驛樓
知君富登覽吟興滿滄洲

題番馬圖

玉塞無聲夜有霜
橐駝五萬入漁陽
平沙落日悲風起
馬上橫捎四白狼

楊

魏 二十一首

魏字伯謙海豐人嘉靖丁未進士除武進知縣
入為兵科給事中歷右都御史巡撫宣大陝西
山西入為兵部侍郎陞南京戶部尚書召入改
工部復改戶部再改吏部加太子少保進太保

贈太師有夢山集

朱中立云夢山詩不事雕繪旨趣天成
王貽上云先生五言直舉胸臆真澹雅素

而格在其中陶韋嫡派儲王之雁行又云先生詩蕭疎簡遠得淵明摩
詰之真品當在蘇門之次西原之上 謝方山云先生擅場本在五言
其近體妙處發源王孟接軌高薛嘉隆塵坌之習曾未染其筆端故是
間代清律 沈山子云夢山五律固是長城其全首矜鍊者不待言句
如風雨樓煩國關山李牧祠春風吹戶牖芳艸遍庭除薄地不盈頃艸
房才數間漁樵原舊業荷芰有初衣花憶春城發門憐芳艸多北窗風
到處深樹鳥鳴時礪雪春仍積岩花夏始開家貧人臥穩橋斷客來稀
杯外分平楚窗中到遠山霜笳連夕院野燒到經臺野燒驚沙雁霜風
落塞榆人垂燈下淚鬼哭雨中魂
皆近自然豈四溟山人所能及

詩話夢山與中麓滄溟同郡而其詩遠法右丞左司近取蘇門不蹈章
丘摘鄙之音不墮歷下叫囂之習信豪傑之士也集不甚傳近新城王
尚書德州謝郎中重為鏤板始行於世夢山自言不知詩補晉臬時學
使者曹君紀山謂當以唐人為宗且辨其體格及歸田四明呂山人往
來海上相與倡和共明此道云云呂山人者時臣中甫也紀山名汴江
陵人嘉靖辛丑庶吉士仕至右副都御史巡撫雲南以夢山推許若是
度其詩必有可觀惜無好事如王謝兩公刻之以傳也當嘉靖初北地
信陽朝華已謝滄溟集盛唐人字句以為律一時宗之正猶隋苑剪綵
成花淺碧深紅未嘗不眩人目然生意絕少此時讀夢山詩
如水仙十囊江梅一萼嫣然薄冰殘雪之外有不愛惜者邪

春日述懷

曉齋春雨歇一鳥當窗鳴山雲入我座不知在邊城夙
心本閒曠偶無塵事縈手把楞伽讀忽已忘吾生軒冕
是何物可以嬰其情君子貴得道誰能顧浮名

醒後聞磬聲

冷然響清磬我思良悠悠披衣一起坐明月懸高樓遙

明詩紀卷四十三
遙目天宇空闊萬象收此時無人言獨與太虛遊河清
不可俟天運倏已周冥心入無極真想存浮丘人生亦
晝夜身外更何求

漫翁詩

子美稱漫郎次山號漫叟兩公皆偉人斯名傳不朽余
本疎闊士且與病爲偶性惟率其真名不居其右雖嘗
爲文章不習韓與柳詩韻尚未諧况復辨好醜亦嘗涉
世故世故良難剖執事與掄材舛錯恒八九自信惟此
心得失兩無有所幸遂歸來惟與鹿豕友耕也不知獲
漁也不用笥富貴若浮雲詩書成敝帚於今年八十萬
事空回首茫茫視天地未知誰長久仍欲惜豹文仍欲

競雞口縱得千載名何如一杯酒歲月自盈虛吾生無
譽咎從此稱漫翁可並古人否

送黎樂溪轉甘肅太僕

白嶺千山外黃河萬國西塞雲秋渺渺沙艸日淒淒遠
地愁離別邊城尚鼓鼙昔賢名未泯勲業爾能齊

北棲口留別許叅戎

絕塞難爲別離尊駐晚暉悲風嘶去馬落葉上征衣野
燒臨河斷寒沙帶雪飛邊城人不到此後信應稀

忬州雨夜

世慮已難遣况當旅館秋寒城夜半雨故國夢中樓河
漢幾時曙蛩螢增客愁鴈門明日路鼓角入邊州

柏林寺別王計部寺即李晉王葬所

園陵今作寺秋艸向沙陀事歎千年往人憐兩度過山
川明霽雪鐘磬帶煙蘿於此別知己尊前意更多

壬申九日登覽曠亭憶舊兼喜谷司馬初還次前

韻

往事真如昨登高復此間歲時人半老江海客初還暮
鴈聲偏疾寒花色自斑不須多感慨東望有牛山

秋日閒居

笑我起居處寥寥一竹床長貧諳性命多病識行藏地
與紅塵遠秋憐白日涼山僧久不至木落井西堂

送汪山人遊山海

自是江湖客猶然變姓名妻孥貧不問書畫老逾精雲
黯秦王島山高孤竹城同誰登碣石醉看海濤生

雨夜董信溪過訪

臥病滄江上柴扉晝不開况茲風雨夕乃有故人來遶
屋吟黃葉疎燈照綠苔平生丘壑意共盡掌中杯

秋雨宿黑石嶺

嶺險藤迷路山高石作城片雲何處雨孤客此時情茅
屋幾家住秋風半夜生旅魂愁已絕况聽鼓鼙聲

早秋登龍門城樓

指點雲州地真為漢北門八城臨大漠一路向中原晴
日山川映秋田禾黍繁文莊經略處父老至今言

經順聖川

野曠行人斷風高戍鼓鳴青山鄰絕漠白日閉孤城戎馬千年地江湖萬里情不堪征戰後極目一沾纓

環縣早行

羌狄平無日滄江未擬還燈前梳白髮馬上夢青山薄曙羣峰外殘星杳靄間雞鳴問何處已度古蕭關

蕭關北作

塞路山難斷天愁雲不開遙驚戍火起數見羽書來周室朔方郡唐家靈武臺客心正多感羌笛暮堪哀

宿瓦雲驛

蕭條來野館秋艸正淒淒復此聞風雨兼之厭鼓鼙經

年堦樹老入夜怪禽啼獨坐生歸思田園渤海西

沙磧驛逢劉參戎

風塵滿目塞門間媿我書生鬢欲斑為問干戈何日定不知江海幾人還河聲暮遶沙邊驛雪色晴看天外山全仗將軍能破敵莫令匹馬近三關

酬劉二府過嶺園

老喜高軒海上過開尊嶺圃對煙蘿纔聞朔塞兵初罷豈料中原事漸多話到蒼生流涕淚愁臨岐路邈山河眼前君最強吾意國士寧論甲乙科

春日南野讌集

南郭春偏好留人到夕陽風吹山鳥語花落酒杯香

憶舊有感

丁卯橋西憶舊遊
綠楊高映酒家樓
故人莫訝凋零盡
一別江南四十秋

陸光祖 一首

光祖字與繩平湖人嘉靖丁未進士累官吏部尚書贈太子太保謚莊簡

金陵懷古

宰木蕭蕭起暮風
君王不復渡江東
舞衣滿地生新艸
過客沿溪問舊宮
垓下一朝離不逝
咸陽三月火徒紅
英雄轉鬪無完策
四面悲歌入帳中

林 爓 六首

爓字貞恒閩縣人嘉靖丁未進士累官南京禮

部尚書贈太子少保謚文恪有對山集

王伯穀云先生詩文

爾雅若璞玉渾金無詞人藻繪刻鏤之習

馬侍御宅偕同館諸丈宴集

人生百年內奄忽浮雲馳
隨風日萬里聚散難可期
昔我同門友王事各乖離
豈伊道路遠邈若天一涯
三秋積晨暮耿耿懷相思
何悟升斯堂復得一追隨
豐殺列綺席美酒溢金卮
相見各怡然獻酬吐芳辭
蘭膏繼明晝良夜殊未疲
烏棲戀共林魚遊樂同池
交誼古所敦久要諒不移
今夕良宴會貽爾伐木詩

舟發芋江別諸兄弟親友

宦遊二十載幸始歸故鄉盤桓未及久戒徒復嚴裝豈
不戀樂土王事有靡遑遲遲出郊郭回顧悽以傷秋風
何飄飄吹我征衣裳兄弟送我行執手淚數行親戚送
我行各攜壺與觴日暮客程促踟躕猶路旁泛舟沂大
江怨彼道里長落葉雖隨風遶樹自飄揚禽鳥失儔侶
嗷嗷鳴迴翔矧伊骨月情離別天一方暫且赴簿領行
當返耕桑努力各自愛引領遙相望

工曹後園觀稼

伊昔仕京華不忘畝畝志幸此南土遷公署有餘地後
園墾爲田蕪穢舊已治陽春倉庚鳴四埜肇農事晨興
戒農夫播種及時至薄言勸其勤簋飧數器實閔東
作勞豈要西成利周行阡陌間嘉樹或時憩即日雖暫
欣於心慨未遂伐檀刺素餐鶉梁譏竊位自顧魯鈍姿
食浮久吾媿悠悠望故山懷古有深意寄謝沮溺群高
蹤庶可企

孝烈皇后挽歌

鳳穴金宮秘龍章寶冊宣曾將五色石能補九重天桂
殿花空落松門月自懸惟餘歌懿德長續二南篇

送二兄謫平樂貳守

暫會仍分手離魂黯欲銷如何適萬里况乃傍三苗中
土風煙隔征途雪霰飄願將盤錯意持報聖明朝

詠史

朱雲折檻日賈誼上書年感激廷空爭飄零席始前白
頭槐里令青簡汨羅篇直道元如此千秋世共憐

王樵 五首

樵字明逸金壇人嘉靖丁未進士累官南京右
都御史贈太子少保謚恭簡有方麓集

詩話方麓研心著書自言六經畢其四詩特游藝然清婉軼倫
當甌甄太函白榆澹思叫囂之會乃聞此雅韻實獲我心也

短歌答趙江都金山見懷之作

海門兮長風中流兮孤嶼懷美人兮何方覽大江兮東
去

香山寺

曉色開層閣春天淨翠屏檻凭千樹綠門掩四山青遠

寺分林見流泉夾路聽禪房人不到花竹晝冥冥

除夕

塵事俄消日他鄉亦作年功名慙鏡裏兒女且燈前

望湖亭 二首

平疇門外春雨遠寺山西夕陽柳暗溪橋輦路水肥種

桂江鄉

孤村數家隱樹一曲清流抱山四月城中未有林端黃

鳥關關

宋儀望 三首

儀望字望之吉安永豐人嘉靖丁未進士歷官
僉都御史巡撫應天進大理寺卿有陽山橐華

初去吳門作

營世無疾途筮仕獲下秩綰綬出明邦感懼情非一雖
抱濟物情良缺經世術簿書日紛紜督賦無寧日覩茲
民力艱焉忍事桔槔淳風古已頽文質相毀蝕慙無下
堂化何由示師帥直道旣已危降志還見嫉沉憂結衷
腸能不慚三黜徵書來日下濫此樗朽質新恩詎云辭
夙抱未及畢驅馬出郭門寒風正蕭瑟道傍凍餒人對
我長歎息殷勤謝父老聊以微衷述

自樂城趨柏鄉

朝發樂子邑暮投柏人鄉驅車多所經指顧情內傷燕
趙昔吞并四海如沸湯豪俊相馳騫一言決興亡故壘
何蕭條云是古戰場俯仰今昔間沉痛結衷腸纍纍道
傍冢誰辨愚與良燕昭旣不存平原客久荒不見黃金
臺樹木鬱蒼蒼息駕暮雲沉感歎彌難忘

遊梅仙山

白雲在深山山深轉空翠古木凌飛煙叢竹亦森邃梅
公隱何時漢道昔云季當其抗言時鼎鑊寧足畏一斥
眇何所去作南昌尉茲山信超曠盤鬱多佳氣幽棲亦
何爲豈不以我貴一朝變姓名挂冠從此去新舊相太
息妻子不知處余亦骯髒人誤觸當時諱見幾苦不早
撫已有深媿永願謝塵緣長往從我志

胡杰一首

杰字子文豐城人嘉靖丁未進士改庶吉士歷
南京國子監祭酒陞太常寺卿有劔西橐

九日馬西田侍御讌具瞻樓

亭閣嵬嵬俯一丘柏臺清讌復高秋籬邊黃菊經時晚
谷口青驄竟日留抱病有懷仍對酒自公多暇幾登樓
臨風不用傷搖落歸路月明山更幽

馬一龍二首

一龍字員圖溧陽人嘉靖丁未進士改庶吉士
歷官國子監司業有遊藝集

湖上有懷

湖上青山半入城湖中風景坐來清高飛雙鶴與天近
遠去孤舟隔水明為客故鄉秋雁杳懷人落日暮雲平
無端忽起思歸念相對尊前共一傾

新豐夜泊

新豐市上酒家邊夜泊沽來不用錢北風吹雨欲作雪
客子到家將近年京國書傳千里外剡溪路入小村前
深林舊有高人隱尋到梅花却繫船

章适一首

适字景南蘭溪人嘉靖丁未進士歷官禮科給
事中

塞下曲

材官三十萬日夜出臨洮不見烽塵息惟聞甲第高盤
鵬依障落獵馬向秋豪辛苦從征地黃沙蔽白蒿

孫永思 二首

永思字性孝蒲州人嘉靖丁未進士除行人選
授浙江道御史

海珠寺讌同鄉李崔二鴻臚

象設鄰鮫室江流達海門上方無陸路四壁有潮痕香
霧籠珠樹飛花墮玉尊漁歌相聽處萍水不須論

登鎮海樓用韻

越王臺接五城樓島嶼連空起暮愁瘴海波濤浮日月
炎天風雨自春秋亂帆歸晚聲相軋萬樹邊江葉盡流

莫向危闌聽吹笛武陵離思在南州

詩話二詩侍御巡按廣東
時作蓋嘉靖丙辰年事

楊繼盛 二首

繼盛字仲芳容城人嘉靖丁未進士除南京吏
部主事入為兵部員外郎坐論馬市貶狄道典
史稍遷知諸城縣陞南京戶部主事轉戶部員
外調兵部疏劾嚴嵩論死贈太常少卿謚忠愍

有集

皇甫子循云楊忠愍辭尚宏麗語罕怨詆江河一瀉乃徵其才
光談萬文悉由於氣 蔣仲舒云楊公忼慨赴死讀其詩想見
其人沒世而
後猶有生氣

送徐子與讞獄江南

寥落白雲司半虛看君此去更何如西曹月滿幽人榻

南國星隨使者車塞雁不堪行斷夕秋風況是葉飛初
秣陵故舊如相問為道疎狂病未除

懷鶴峰東城因寄

屋梁落月應懷我春艸池塘更夢誰記得別時懸淚眼
佯為笑語怕相思

彭輅二首

輅字子殷嘉興人嘉靖丁未進士除江西布政
司照磨遷知新淦縣左遷應天儒學教授轉國

子監博士陞南京刑部主事有比部集

焦弱侯云先生詩意

高簡冲融婉秀卓然名家是時七子出互相矜詡雖有名於時而辭調往往如出一人先生能為眾所不為不少貶以就俗宜其知者鮮矣詩話先生早慧於詩文不甚敦琢其持論取法中唐謂神在象外象在言外言在意外然率矢口肆筆而成頗類解大紳卞華伯一流昔人所

以有才多之憾也

良鄉道中

昔去經衰柳今歸見早梅緇塵飛不盡白日黯難開短
劍餘孤憤長歌動七哀年年薊門道空老雒陽才

送祝學博之當塗

姑熟城頭月常邀采石雲山齋看不厭聊以贈夫君

詹萊一首

萊字時殷常山人嘉靖丁未進士有招搖館集

漁火

絕浦漁燈暗空江月色多關山空有恨欸乃忽聞歌風
靜星河沒天寒木葉波孤舟無住止獨酌奈愁何

沈淮一首

淮字激伯仁和人嘉靖丁未進士有三洲集
積雨不能出有懷湖上

霞樓月榭欲生塵水上煙雲積幾旬滿地山花應笑我
雨中春色屬他人

甘茹一首

茹字征父富順人嘉靖丁未進士歷官按察副
使

送成邑博

江城秋色暮客子欲何之司馬浮湘日元王設醴時風
吹猿峽冷霜落鴈峰遲欲識相思調君聽苦竹詞

鄭東白一首

東白字叔曉莆田人嘉靖丁未進士官至按察
僉事

釣舟

空亭一葉下落日五湖秋白幘攜尊酒滄波坐釣舟鐘
聲山外寺樹色水邊樓吾愛鴟夷子浮家汗漫遊

周思兼三首

思兼字叔夜松江華亭人嘉靖丁未進士除知
平度州遷工部員外郎有周叔夜集

送李羅村大叅河南憲長

春風斗酒邵陵西新柳依依綠滿堤征馬不須催客去

日言總卷四十三
三
暮猿何事向人啼道經湘水花初發夢繞漳河路欲迷
故舊那堪頻送別愁看芳艸轉萋萋

題画

遠渚蒹葭滿孤村風雨多明朝江上路誰載酒船過

送林雙池

故鄉故人今別離春風春艸各天涯尊前相對唯今日
去後相逢知幾時

明詩綜卷四十三

